

四庫全書

史部

欽定四庫全書

浙江通志卷一百九十

人物九

介節上

行己之道寧介無通故取舍攸分必以義為斷制
當官而凜四知窮居而嚴一介其絕特之操有足
尚也浙自虞翻朱育之對聲施所被徽美固殊而
亮節清風百世而下聞者猶能興起雖或勲猷未

竟夫亦稱卓爾不羣者已志介節

杭州府

宋

錢景謏

宋史錢惟演傳景謏由殿直中進士王安石既薦遂之又推譽於公卿間自是執弟子禮

安石提點府界景謏為屬主簿又以文薦之執喪居許聞安石得政因事來京師謁之安石顧景謏卒然問曰青苗助役如何景謏曰利少害多異日必為民患又問孰為可用之人曰居喪不交人事而和人尤難事也遂辭出後調官復來安石已作相又往謁之安石令先與弟安國相見安國謂景謏曰相君欲以館閣相處而任以事景謏曰百事皆可為所不知者新書役法耳及見安石安石欲

得一人治峽路役書且委以戎瀘蠻事景謐曰峽路民情僕固不能知而我瀘用兵繁朝廷舉動一路生靈休戚願擇知兵愛人者安石大怒坐上客數十人皆為之懼退就謁舍賞激之與詆為矯者參半景謐笑曰自古來好利者衆而顧義者寡故天下萬事皆由人而不在於己苟為利所動而由於人則盜亦可為也吾又何憾焉遂與安石絕熙寧末從張景憲辟知瀛州終身為外官僅至朝請卒郎而

范儼

錢塘志補仁和人舉進士高第歷郡縣以至卿佐服官二十餘年終日必思所以忠君澤民之

道視聽言動毫不苟雖在暗室屋漏恒多戰兢惕厲及子成立便棄官歸隱布衣蔬食不涉世緣至大觀中年九十餘召家人語畢默然端坐而化

李軌

成化杭州府志字彥淵富陽人崇寧二年進士大觀三年舉宏詞科宣和間提舉廣東市舶居

官廉直珍貨一無所取未幾舶商輻輳召回盜邀之及壯篋隨行書帙而已盜斂衽退避紹興間以清節聞於朝除比部郎秦檜欲以子與軌女為婚却之遷將作監檜屢遣子就學軌告曰為天子卿監豈為宰相教子遂丐外持憲閩部易江東既忤權相累奉祠不復榮望卒年七十七軌澹泊寡欲晚年謂貪與痴已絕獨嗔未盡去因榜其小室曰去嗔著去嗔居士集

郭知運

咸淳臨安志字次張監官人幼刻志問學弱冠登紹興進士甲科時相強與為姻知運弗

樂訖停婚馬仕至荆門守倦求祿任自號息菴老人有文集四十卷名猥藁

褚從禮

諸氏家譜字德嘉以賢良方正舉厯官至太原守居心平恕刑惟求生有捕役獲盜十餘

人皆諭之以義羣盜願求改過卒為良民性甘澹泊一介不妄取日課家僮於公署種蔬以自給世

吏稱廉

韋能千

廣信府志字叔能錢塘人淳祐間為玉山丞性廉介楊有中有田產隸玉山常致餉於長

吏甚腴能千不卻受而附諸縣庫在官與東里趙
渙遊獨厚每過其廬清談竟日止對酌卮酒而去
言不
及私

元

朱清

萬曆杭州府志字元之富陽人自幼力學平居
以氣節自許宋末與葉李為同門生甚契已而

李以京學生叩關斥宰臣賈似道置公田變楮幣
諸新法非便得罪投漳州朋從莫敢往省清獨往

與之訣且為具酒食服用之需俾所親護送出二千里外及似道罷李免歸清候之江上相見無一語相勞第勉之以風節自終元至元間李居左揆士趨附恐後清獨漠然若未始有一日之雅者李每念清不置數遣人迎致之清卒不往以布衣終其身所居在邑之東山下鄉人咸稱東山先生

明

陳世昌

錢塘志補字彥博錢塘人元至正初由布衣入為翰林編修代祀海上值道梗遂留嘉興

授徒養母張士誠據平江屢致不屈明洪武初徵修禮書授太常博士尋以母死辭歸復徵至京而

卒著有希賢集

王謙

萬歷杭州府志字自牧錢塘人有至性父母歿歲時思慕哭泣盡哀居必擇交客有弗當其意

者相對移時不接一語客亦自引去曰吾不可以
涵先生所居在闌閨中左右皆華榱麗宇而譙環
堵蕭然意泊如也洪武初詔求前代遺逸有司以
謀薦授中書進刑部主事尋上章去恬退靜默士
之林高

傅道

德化縣志字士行錢塘人洪武中任德化縣丞
清介自持攜二僮隨任時偽漢初平民散荒野

道力為安輯遂獲成效卒於官以
貧不能歸遂葬城東欽天山麓

花綸

嘉靖仁和縣志字王言仁和人登洪武十七年
鄉薦第一明年進士第三授編修性孤潔宦情

雅薄閒居杜門絕跡往來其於權勢之交更
疎冷有私媚者常惡之竟遭誣害士林惜之

姚震

嘉靖仁和縣志字起東洪武二十九年鄉試第
一授建寧縣丞陞安慶府推官以累罷去尋以

館閣推薦為監察御史擢福建按察副使為人直氣儼容善善惡惡雖在親厚盡言無諱竟罷歸暮年貧不能濟授徒糊口三子俱早世獨長子宙侍婢有遺腹子在他所震門人蔣忠訪得之鞠為後

張昇

分省人物考字仲高杭州人弱冠有才識推擇為郡吏即以清謹稱守以下咸禮遇之洪武間

謁選超授吏部員外郎夫志堅貞終始無玷及卒上察其廉特給驛舟遣內臣送柩還鄉

高暉

嘉靖臨安縣志字汝晦永樂甲申進士歷四川江西僉事宣德四年丁內艱遂致仕不起幼嘗

肄業至思省橋見紙色遺於路拾而置諸牆隙不展視及反見一老嫗哭於橋側詢之知所遺乃白金也遂指其處令取之嫗謝而去仕四川時編氓有烏桓霑益部者訟田繫獄累歲不能決暉察情據理立為斷之感激而去後以黃金馬來謝暉毅然却之其人無以為情乃即其處構却金亭以彰

其德少保于謙贈以詩晞素性恬淡守
貧善詩有復菴集讀易日錄行于世

徐昂

萬歷杭州府志字仲規錢塘人永樂初由舉人授兵部司務陞刑部員外郎謹愿無他技能獨

斤斤以廉隅自守有武士謝某者暮夜懷金來饋昂謝曰君以暮夜饋金豈不聞四知可畏乎堅却之謝慚退無何致仕還過姑蘇病卒無以為殮謝聞之為具棺余遺之人謂昂介特謝君長者清節高義兩無愧云

潘中

萬歷錢塘縣志字大本永樂進士授楚府伴讀骨鯁負氣貌莊而詞確與士大夫計天下事正

論侃侃同列皆敬憚之家法嚴整閨門之內肅如也

王琦

禪寄筆談仁和人中永樂鄉試授汝州學正擢監察御史晉山西提學僉事端軌敦行士蒸蒸

改觀以憂去服闋補四川僉事尋致仕歷官二十年清貧如一日居家衣食不給郡守胡公濬上其事于朝詔賜百金琦以無功受賜固辭竟飢寒死一時藩臬倡義為助殮弟珉永樂甲辰進士歷陞雲南鶴慶知府時郡多劇盜設計勦撫郡賴以寧歷九載以清廉著聲有麥秀三岐之異卒於官

童真

萬歷杭州府志字守正仁和人永樂中由貢生拜監察御史巡按四川振揚風紀不求近名而

牧牧奉公惟知自靖擢山東副使扶滿待次天官當事者諷求一見真不往又使人至其邸真託疾偃卧不與交一言遂徙官廣東即解組歸

褚讓

嘉靖仁和縣志字克卿仁和人永樂甲申進士歷吏部文選司員外郎應介剛正凡有請謁饋

遺屬聲峻絕是以權貴排謗出為山西叅政未幾乞閒卒於家

袁璞

新城縣志字廷器永樂乙未進士好讀書性儉不隨俗侈靡以禮部主事出使封藩餽遺悉却

弗受

徐琦

西湖遊覽志字良玉錢塘人宣德初以左通政使安南黎利盡卻所餽還進南兵部尚書少師

楊士奇畫梅題詩贈之云兩度安南奉使來玉葩曾見嶺頭梅天朝使者清於玉不帶飛塵半點回

吳福

萬應錢塘縣志字天爵起刑部掾屬以從征闕寇鄧茂七有功授兵部司務仕至武昌太守廉

直不苟取嘗過寶應夜宿驛中獲遺金數百急呼驛官收掌之詰朝牒付縣為修學費尚書倪謙為

紀其事

陳信

武林紀事字履信杭州人任大理評事陞蘇州府管糧通判廉明公直有忠政正統十一年年

六十六致仕先時管糧通判各縣糧長咸有餽獻信一錢不受歸家貧甚蘇人持贖追送一毫不取

周子良

分省人物考錢塘人正統間為職方郎苦節自持數鬻戶產以支官費有千戶王姓者以

事褫職子良愛其才貲之已而王以三百金入酬大叱之欲暴於衆因伏罪求免乃麾使去

周倫

分省人物考字叙昌杭州右衛人正統甲申舉鄉試歷嘉定容城訓導終永寧教諭所至講讀

無間寒暑至老不倦事上以禮恥隨時容悅與人言剖析是非不為依違未嘗枉己以干權勢為廣文者三十年意豁如也喜赴人急難排斥異學有剛方之節貪懦者聞風而改

項麒

禪寄筆談仁和人景泰七年由舉人授南京吏部司務歷陞刑部郎中憲皇登極應詔陳言上

五事內指宰輔阿媚甘心屈膝及中官擅權語甚剴直聞者咋舌無何以病乞致仕家居三十年絕

跡公府家貧屋空僦屋以居巡按吳公高其節授屋一椽固請始受而處焉兩浙名賢錄麒麟字文祥致仕家居厨無兼日之積而自處坦然吟咏不輟平湖賓尹以賄敗臬司邵某舉麒麟清節論之曰汝何不學項正郎乎蓋魏之也尹意邵雅重麒麟即暮持百金求為營解麒麟厲聲却之尹慚而退

陳嘉猷

兩浙名賢錄字世用自餘姚遷家於杭舉景泰辛未進士授禮科給事中嘗兩使外國堅

辭餽獻清風峻節人皆敬之陞右通政居父喪卒

吳誠

兩浙名賢錄字尚忠錢塘人景泰辛未進士授兵部主事歷官至副都御史巡撫湖廣改雲南

卒於官誠才識宏遠前後所歷官皆有政績其撫雲南叛夷尤盡心力為人淳樸簡重敦厚姻族恥言人過與人交敦信義久而不渝衣裘樸野居鄉混迹閭里未嘗飭駒從盛車徒嘗以婚禮盛服入

城鄉人廣南守徐敏見之疑其變節過宋叅政鏞所言及相與嗟悼之頃則誠至見二人有不愉色詢其故曰非以誠今日與服之異常與二人曰然誠謝過即屏去復衣故衣云子瑜官御史砥節礪行卒殮具不給稱渚美云

張珩

仁和縣志字鳴玉力行好修一介不取嘗溫州却金亭為近名景泰元年領鄉薦甲戌授監察

御史整點京營壯羸老弱過目輒不忘丙戌陞廣東按察司僉事尋改山東發奸摘伏如神部衆驚服中貴溫某餉以金綺珩拒却之溫愧擲於河中陞副使致仕歸橐中蕭然如寒士卒之日幾無以殮

凌鎬

分省人物考字叔京新城人天順庚辰進士授南京刑部主事丁外艱改禮部在任逾五載未

調或勸以進取鑄曰在郎署猶患弗稱敢他望耶
人高其恬退性質實恥為導諛事或未善雖尊者
前懇懇論弗避嘗以此齟齬於
人居官廉靜卒之日囊無遺貲

鄭環

嘉靖浙江通志字瑤夫仁和人天順庚辰進士及第第三授翰林編修歷司經局洗馬太常少

卿廉介方正不妄取與家居足
跡不踐公府人稱其特立之操

馬迪

嘉靖仁和縣志字從簡精易學旁通經史百家天順六年以例貢入胄學選授福建興化少府

職坐清戎遇有亡命流移察可黜補其有絕者務
在開除未嘗追迫或委聽訟因事原情不高刑罰
蔬食布衣人有餽贈婉言辭謝請託
不行後乞休歸行李蕭然壽至八十

張銓

武林紀事字文衡仁和人成化辛丑進士官刑部江西司郎中性剛介不阿時刑部尚書某阿

附內臣事干江西司為言之銓一據法律不肯曲從與天官屠某有葭莩親凡登其門者多得美陞銓絕不一造雖弔賀軸並無張銓姓名以是不果所得俸供不敷其家常糊紙錠充給衣食出為廣西叅議歿於水

查煥

楊旦查煥墓誌字文顯海寧人弘治庚戌進士授南刑部主事以儒術飾吏事轉北刑部員外

出封襄藩盡却餽金陞河南僉事撫巡以其才檄治大梁風紀大振改山東僉事其治一如河南值曹州賊起鎮巡簡往治之不動聲色尋即帖定陞本省叅議自蒞仕至易簣冰蘖之操始終不渝

徐潭

萬曆錢塘縣志字汝容敏之子弘治癸丑進士歷湖廣副使備兵辰沅有豪貴罪當死以千金

賂潭却之持益急後其人賂代事者竟得縱而潭反被深文遂罷歸囊橐蕭然居無華堂出無輿從

赴親交之急輒傾
貲空困以為之

沈綸

萬曆杭州府志字朝綬仁和人弘治丙辰進士累官南禮部郎中廬州知府清介絕俗典郡不

以家自隨廬州古合浦地中貴守珠池者往往乾沒於是豪右竝緣為奸綸裁之以法權豪側目卒中傷之綸死二十餘年民思其德為築愛民亭以表廬平

施魯

萬曆錢塘縣志仁和人為荆府長史正德五年荆王疏魯賢且久請增秩四品劉瑾忌之矯奪

魯官勒歸故里瑾伏誅詔徵魯復用魯不應召遂終老於家無一畦尺椽之藉東西僑賃不常非其義不受也嘗有施姓餽粟三十斛求冒魯族固却之時方絕糧處之晏如藜藿不給而沒

張應祐

萬曆杭州府志字元助仁和人正德己卯舉於鄉嘉靖辛丑授蘇州府通判蘇錢穀甲天

下府倅領勸農者里甲有例獻應祐悉拒却之以
子洽登第任三月即解組歸當路魏之賸輒不受
事二親孝伯兄官西曹郎從子瀚至卿貳瀛至都
御史洵溥至郡邑牧長衣冠鼎盛為郡城甲應祐
處之益謙退
人皆稱薦厚

嚴大紀

兩浙名賢錄字汝肅餘杭人嘉靖己未進士
授行人歷郎中官至光祿卿旋晉太常予告

歸卒大紀方成進士風采表著分宜相欲引為同
宗大紀執不可甚銜之相旋敗得不及禍屈考選
當得臺省而年未及格會時相為座主諭以稍益
其年大紀又執不可比晉光祿時壽陵議及政府
多左袒遷大峪者上疑之勅諸司各議保大紀獨
執不署上問有勸露章者大紀曰我實不諳堪與
家言何敢妄有陳引第上下雷同非國之福故不
為耳舉朝服其言執政者益銜之嫉私人論奏遂

拂衣歸居恒恂恂若儒生而遇大事輒屹如山岳雖生死利害不可搖奪

周浩

錢塘縣志嘉靖壬戌進士仕至廣東憲長家無餘貲入市與僕隸肩摩往往受侮不變色福州

府志浩字毅夫錢塘人隆慶中為福建轉運使商有常例錢歲計可千餘緡浩却之曰爾無逋課足矣

祝繼英

獻徵錄字思堯海寧人嘉靖十四年以鄉貢授繁昌令之官不以家累自隨二童子與處

服食器用取給於家澡手治事日飲江水而已馭吏以禮治民以情不為小威六年調繁石城縣棄

官歸

張涑

萬恩杭州府志字文東海寧人嘉靖辛卯舉於鄉世父負官錢數百千涑賣產以償或曰若幸

交當路何惜一言遽棄先人產耶涑曰貲產易得節槩一失不可復贖竟罄產抵之以是家益貧初涑為諸生與童漢臣方九叙友善時稱三傑後兩人皆登仕籍憫涑窶處時餽廩餼輒不受或固餉之至再勉為一受涑於世一無所屑與當路談累日未嘗及時事恭寂不給晏如也竟以窮阨而歿年三十三著有窮居集漢臣為梓以行世

張灝

兩浙名賢錄字子清仁和人嘉靖戊戌進士授刑部主事改吏部晉文選郎中獎恬退抑奔競

請謁不行芑苴無所用一時仕路肅清擢通政出為僉都御史提督畿南北諸郡屯田事坐訕左遷歸

高燦

臨安縣志字德威嘉靖己酉舉人授通江令丁艱起復補蒙城多異政當道交口旌之三年上

計銓曹幡然歎曰大丈夫負七尺軀使氣橐中時而枯槁時而繞指何殊逐臭之蠅處禪之蟲耶遂棄官歸杜門謝交游曰親圖史不入城市布衣蔬食澹如也邑大夫造其廬謝不見

王蒙亨

餘杭縣前志字仲明中萬曆戊子舉人任懷寧縣三載愛民勤政銳意興除合邑賴之性

峭直不能媚上官遂致政歸家居閉門却掃未嘗一謁公府

周啓祥

萬曆廣東通志海寧人進士萬曆六年以刑部郎中出知廣州府治爰書雖老吏不能過

門以內澹如禪舍茹蔬服陋每出簡輿從所至人不知其郡大吏也以病卒於金牛驛囊中可數金而已

高從禮

仁和縣志字質甫幼失父家極貧常與母王共篝燈母紡績從禮讀書萬曆丙戌成進士

授刑部主事奏獄全活數百人出守臨江陞江西按察使時中使四出有閹役窘辱士人至激訟官不敢問從禮閣役置之法網紀肅然有竄詩集納珠以獻者從禮檢集得珠急返之叅藩時庫有贏餘吏以白從禮戒令封貯備公用待母至孝母或不悅輒長跪膝前伺母意解乃起以疾卒於家

許令典

海寧縣志字同生萬厯丁未進士令上饒調繁無錫並有惠政遷守淮揚不受一錢任未

五月會中璫出鎮即日引疾歸構東垞西垞於黃山之麓自號兩垞外臣黃冠野服與販夫牧豎雜坐問答不知為大夫也邑有大利害輒陳當事無不以一言為重家居絕綺紈不侈宴會不收僕隸年六十五寢疾誠其子勿求諛墓作自祭文題二絕而逝

林杞

杭州府志字彝白仁和人萬厯丁酉舉於鄉六上春官不第授潁州牧多惠政擢武昌府同知

權商稅不取一錢吏民頌其廉恕郡僚公譙黃鶴樓忽巨盜數十至手刃推官孫某太守走匿屏後盜目杞曰公居官清介素號長者吾不相犯也遂棄官歸杜門著書與同年劉宗周相切劘所著有彞白齋穀音集行世

吳大山

錢塘縣志字仁仲居鳳凰山之燕窩江西副使源之孫光祿寺卿果之子萬歷辛卯中順

天鄉試為部郎歷任雲南叅政有富商為盜所誣家破而冤不雪大山至一獄而出州牧有以寶玉精鏐求注上考者大山曰暮夜之金可畏也其人懷慚而去未幾乞休歸於西湖築別業植老桂修

莖顏曰輞川

張大烈

錢塘縣志字言冲天啓丁卯舉人司李瑞州謝獄多所平反署郡篆山城民瘠鎮以安靜

人皆戴之不善事權貴竟以浮躁去官崇禎壬午有詔起廢輒不及吳太冲為南國子司業移書吏部曰前瑞州司李張大烈居官廉潔晨殮不繼今有詔起廢而不及是所取者情面所去者人品也吏部得書大慚然竟不舉大烈事父母以孝聞與弟大勲同居有無相共子天無嗣

沈繼震

張遂辰沈繼震傳字子起錢塘人少質直父置書膝上教督之繼震跪而受教既長周旋

中規矩不踰尺寸為諸生四十年非試於有司不公謁亦未嘗一謁至郡縣門弟子束脩外不妄取一錢病妻弱女四壁蕭然支一足鐺以繼旦夕力學嗜書尤長於春秋窮老無子寢疾猶吟咏不輟

晚更
名曙

錢喜起

舊浙江通志字廣明號武山仁和人崇禎庚辰進士授工部屯田司視蘆政號稱廉辦出

為南昌守丁母艱戴星歸里後構一小樓坐卧其間者三十六年年八十四卒

國朝

傅感丁

錢塘縣志字雨臣順治壬辰進士授德安推官擢監察御史轉刑科給事中凡所論奏皆

見采納出巡河東鹽政歸惟琴書一束行李蕭然歷副都御史尋以母喪歸遂不起鄉賢留祀冊著有易傳纂義古史集要祥刑輯要舒嘯軒集康熙三十九年入祠

盧琦

錢塘縣志字景韓康熙丁未進士選庶吉士授編修歷詹事府少詹擢內閣學士兼禮部侍郎

文章爾雅尤熟朝章典故既參密勿門無雜賓應酬竿牘一切謝絕歸田後日課子讀書不與戶外事官至三品家產不踰中人粗衣菲食淡如也

顧祖榮

錢塘縣志字山容康熙癸丑進士選庶吉士授編修丙辰會試同考擢得士歷侍讀遷內

閣學士兼禮部侍郎歷踐清班居京邸門不施帷箔僅以蘆蓆蔽風雨每食蒸豆一器飯一盂而已

母喪歸以

哀毀卒

凌紹雯

錢塘縣志字子文甫三歲母朱氏口授毛詩即成誦少長肆力於子史秦漢唐宋大家之

文窮流溯源士林推領袖焉康熙戊辰登進士選庶吉士授編修累官至內閣學士兼禮部侍郎其

間與纂修者三典鄉試者再兩充日講官一教習庶吉士為人清介自守自庶常歷閣

學未嘗攜家累至都寓翰林官署中所乘止一羸馬老僕三四人衣服浣濯者數十年不忍棄攻苦

食淡不妄交遊閉戶讀中祕書兼授生徒以終老尤善

國書有請業者口授指畫無倦色年七十一卒於官

論祭馳驛

歸葬

楊許玉

鄉賢留祀冊字介璜仁和人少失怙廬墓讀書順治戊子舉人授陝西府谷令有招撫功

陞太原郡丞攝代州篆以廉吏稱轉陞晉陽因念母乞終養去之日行李蕭然後數年母卒躬舂鉅築墳有勸以服闋補任者謝以詩有青山傍母堪埋骨五斗寧能再折腰之句守墓三載著書談經不與外事人稱真孝廉卒年七十一

盛鍾賢

鄉賢留祀冊於潛人康熙己未進士授江西高安知縣在任六載卒於官性至孝家貧菽

水以養志釋褐後家居十年無片楮及當道及任高安以清廉著稱茶苦自甘一塵不染卒之日啓

索無長物幾不能殮邑人感其德者
醵金為賻始克襄事人稱廉吏云

嘉興府

宋

章元振

萬歷廣東通志嘉興人紹興中知肇慶改廣
東提舉與秦檜同登第廿於遠宦未嘗以私

檜

錢文

正德崇德志字文叔乾道乙丑進士尉當塗捕
私茶當進秩力辭不願以為績知萬載縣稱神

明還知循州愷悌宜民卒年六十五為人色溫氣
和廉而好義居不蔽風雨田不供餽粥歿祀鄉賢

明

沈淳

弘治嘉興府志字惟厚嘉興人由進士任吏部員外郎年六十致仕初為弟子員時歸自學宮

道遇一少婦色甚麗欲就之淳不顧婦忽不見始悟其非人嘗讀書精舍有鄰女夜奔閉門堅拒壽

八十終

施奇

正德嘉善縣志字廷偉景泰進士授工部主事嘗清匠江西至建德縣鄉人有官縣幕者以白

金餽奇堅却之成化初擢太平知府考績連最壬辰入覲時順天府尹缺吏部欲擬其名適父訃至或勸奇緩發奇曰虧大倫以得美官可乎奔喪抵家哀毀骨立服闋改知萊州府卒於官

劉侃

萬曆嘉興府志字克剛嘉善人景泰舉人知涇州政尚寬簡御史論薦擢延平守性極廉約言

芑苴輒面發赤而起兩赴官皆驚產以行及謝病囊橐蕭然授徒自給足不入城市自號樂閒工楷

書詩文亦清
麗卒年七十

倪輔

天啓平湖縣志字良弼天順進士授吏部主事
釐剔奸弊不避權貴改禮部冊封恭楚二藩不

受餉陞湖廣叅政一介不
苟取治洞搖恩信旁及

許盛

分省人物考字昌世平湖人天順八年進士歷
陞雲南副使剛直廉介所至有冰蘖聲致政歸

囊橐蕭然即世未幾
子孫有不能自存者

張端

福建通志嘉善人成化間知建安有中
貴經縣恃勢索賄端力抗不與卒於官

范璫

萬曆嘉興府志秀水人弘治庚戌進士授德平
知縣潔己愛人以治行最去任僅餘俸二金尋

以病卒歷官十五年不克葬闕中彭幸菴分巡嘉
湖憐其貧為治兆域要郡邑大夫送葬舟車塞塗

劉演

海鹽縣圖經字文敷弘治癸丑進士南職方主事歷刑部郎中值閭瑾亂政拂衣南還人服其

高理誅薦起四
川叅議以疾卒

顧正

海鹽文獻志字尚誠弘治壬戌進士正德丙寅任兵部主事守山海關陞刑部郎中剖決如流

情罪悉允壬申歸省有海寧周邦被誣懷千金求解正曰取招由看看畢曰必脫也卻其金同邑馬宗岳者肆橫饒使劉某按邑訪拘馬懷金求救邵之言於劉曰巨惡幸毋漏網戊寅擢四川叅議嘉靖改元以疾弗起居官二十年屋圯不能葺

沈圻

天啓平湖縣志字子京正德辛未進士除御史以直忤當道謫高郵州判陞休寧知縣矢心冰

藥歷固原兵備發巡按之奸陞貴州叅政歸父子俱官藩臬產不及中人

劉玘

平湖縣志字廷璧正德丙子舉人知五河縣潔已愛民省刑薄斂歲侵輸家粟以賑五河不解

織絳為造紡績器以教之去官日民為治具送歸終南刑部主事

潘鵬

天啟平湖縣志字惟遠自少苦學以明經自任不問家人產領正德丁卯鄉薦倖肇慶府視身

清白任事慷慨時羣盜蝟起悉力禦之境賴以安致政還橐中惟圖書衣被家居二十餘年遂葬如故麓耦是甘足不履公庭門下執經者益眾咸稱東淵先生

張璵

萬曆嘉興府志字叔美崇德人正德丁丑進士授南刑部主事以直道忤權貴遂致仕家居三

十餘年所居不蔽風雨薄田僅供饘粥

諸偁

樵李往哲初編字揚伯嘉興人年四十始登第正德丁丑授黃梅令改大名轉陞刑部主事進

貴州叅議上官遇上官至輒有餽餽爾悉却之後擢
本省按察副使持法廉平致仕為人不設城府至
非禮相干則艷然見於色尤嚴取與歷官二
十五年囊橐蕭然間以請謁來者必峻絕之

陳所學

鄉賢留祀母字行父海鹽人嘉靖丙辰進士
中書舍人遷戶工兩科給事中歷四載疏乞

二十餘上並切當世要務後以他事忤權相疏乞
骸骨不報旋出為河間守至郡多所興革而上官
希權相意誣劾之即日解組歸買一
椽名其山曰一笑因自號一笑生

祁鯨

桐鄉縣志字國升嘉靖己卯舉人視躬修整一
時英俊從游者甚眾居鄉敦厲實行每逢邑大

夫初蒞輒以禮見後則
絕跡公庭未嘗私謁

郁蘭

萬歷秀水縣志字文芳嘉靖甲午舉人屢蹶公
車時姻家吳太宰鵬謂之曰貂裘敝矣盍及我

而選蘭謝不從及鵬罷歸始謁選得績溪令裁諸
供億持法公平不肯嬖阿上官某甲希執政旨論
逮胡宗憲郡守以屬蘭蘭曰司馬有功東南奈何
欲文致之吾官可去法不可枉也竟得未減還南
刑部主事尋乞終養家
居絕跡公府以澹泊終

徐瓚

萬厯秀水縣志嘉興人徙居秀水任廣東海陽
巡檢會當開礦聞父喪賈人餽之百金冀緩須

史行可亟發獲倍利瓚卻之曰父死之謂何豈以
百金易名節哉即日奔喪濱海人為立邵金碑以

陳善道

天啓平湖縣志字敬夫嘉靖庚子舉人知德
安縣築城備流寇民扞網者治無貸倖廬州

不私贖金陞松江同知禁通逃數不畏權
勢歸田二十餘年布衣蔬食不減寒士

沈科

嘉禾徵獻錄字子進嘉善人嘉靖甲辰進士授
工部管轄司主事知臨江府遷江贛兵備副使

時官江右者皆嚴嵩私人聞科才陰令人諷之正色曰科即不材奈何以天子臣為相公奴隸嵩銜之未幾轉苑馬寺正卿左遷河南副使有欲為科謀解於嵩者科聞之謝曰奈何首鼠耶即柄人幸而釋我更何面目俯仰人世卒不聽甫之官嵩嫉言官劾罷之科事親孝撫其弟友愛生平磊落多大節有史抄十二卷

俞乾

萬厯嘉興府志字一清平湖人嘉靖甲辰進士授刑部主事勢豪犯重辟者夜懷金賁緣中貴

以請乾正色斥之竟致之理時分宜相傾貴漢論死乾監斬西市義氣憤激忽仆地移時甦具疏乞歸衆憐其貧贖之悉不受抵家五月卒

周恂懋

嘉禾徵獻錄字季實秀水人嘉靖丁未進士令樂平五年苞苴屏絕詣京時父老餽之金

卻不受陞職方主事監督朝門工勞瘁卒官橐蕭然士大夫捐金助殮有女不能嫁郡守資之奩具後直指按郡廉其清白為給貲修墓

盛周

嘉興縣志字文湖嘉靖癸丑進士以閩中令行取入都時分宜子世蕃竊威福趙文華往謂周

曰東樓虛臺垣相待君曷過之周笑曰士所以望登臺垣者欲以清君側耳今先以身乞憐異日何以自立竟不往遷南刑部主事出為東昌守卒於官

黃鯨

萬曆嘉興府志字崇文秀水人嘉靖丙辰進士授兵部主事里人為太宰欲啗以美官鯨不從

出守皖江秋毫無染擢湖廣副使時有竹筍河之後鯨實董之漢沔獲安尋改貴州上疏乞歸居家以節儉聞嘗誡諸子曰不大節者不大廉不薄享者不厚餘人以為名言子洪憲

嚴從簡

萬曆嘉興府志字仲可嘉興人嘉靖己未進士任行人有事樂安王府以金幣餽悉卻不

受轉工科給事中管監甲厥稽覈嚴密奄豎銜之謫揚州同知解綬歸為人純粹真誠嗜書不釋卷

素不事家產惟

以清白貽子孫

屠元沐

嘉禾徵獻錄字沂春嘉興人嘉靖己丑進士授工部督儀真及張秋河道節省甚多陞山

東布政使參政赴官屏去導從人不知為憲使轉廣西按察使益厲清節進本省右布政使乞休加

太僕寺卿致仕杜門謝客不異寒素上聞其清特詔有司具禮存問卒年九十餘遺篋殘書數卷與

敝裘革

帶而已

沈奎

海鹽縣圖經字文明試南宮第四歷官江西按察副使孱弱不勝衣而操持介特為郎時宗室

詔獄衆依違可否奎直舉大義斷之在江右與臺臣執論無所異避家居却掃門無雜賓一語涉嫌私噤不出聲子騰蛟性孝友弟騰龍奎晚年所出析箸不及蛟之半奎卒十年忽一日召龍飲割己之半與之人不知其故曰此吾父不言意也

王大猷

海鹽縣令經字伯甫為舉人時遇凶歲饘粥不具縣令魏某遺之金不受舉進士授中書

舍人僦邸委巷跨一畝段了公事歸輒閉戶謝客歷官兵備雲南改廣西甫陞辭為中傷罷以直己取忤而終不易其守

李樂

桐鄉縣志號麟川隆慶戊辰進士擢給事中有謬謬風歷官尚寶司卿居官以耿介聞一頓一

笑不以假人居鄉无峻同郡紳士咸敬憚之著有見聞雜記行世

戈用泰

天啓平湖縣志字來陽癸酉領鄉薦己丑成進士令涑水涑號街煩加以屢用泰悉心

撫字會採石開礦以身扞民觸諱不顧擢南比部晉郎中念父春秋高乞歸朝夕孝養無一掾寸土

之庇廷推再三堅卧不出著有適適軒集

沈夢斗

萬厯嘉興府志字應宿萬厯丁丑進士令盱眙以內艱歸補常熟政務寬簡士民戴之如

父母獨不得上官意轉令醴泉以政最移守信州復移無為州恤災清稅殫盡心力勞瘁遘疾卒於官至不能敘察友醵金以觀歸

劉世埏

海鹽縣圖經字敬修熈子萬厯丁丑進士授行人擢南刑部主事居官以禮法自持遇考

選擬以兵科客有告者曰某以賄入易而名矣請如所賄定而名謝弗應日夜披讀求民冤隱考定

律例為疏解刊署中嘗奉使歸從里中借小輿出入徒步過尊長家侍父妹立中宵不奉命不敢退不發私贖不受人餽遺不恃門閥走要津以求速化

馬應圖

天啓平湖縣志字心易萬厯丁丑進士任行人奉使歸篋中圖書數卷司選者廉其清欲

擢臺省遣人示意應圖曰吾肯作呈身御史哉遂遷刑部主事陞禮部郎中疏劾科道齊世臣等并及首輔神宗怒謫典史陞邑令再陞刑部主事病免歸家貧假貸不得布袍草屨燃紙代薪僮僕二
三鵠衣百結為傭餬口歲時一詣階庭而已事繼母孝聘妻有痼疾勸之別娶不聽迨歿幾不能殮
胡士奇 天啓平湖縣志字重之萬厯丙子舉人家赤貧僦舍一楹以居署進賢教諭擢國子博士
轉兵部司務會上怒職方郎郎首輔子輒移罪司務謫仙遊訓導攜一蒼頭抵任歲餘卒遺囊僅圖

書數卷婦更貧困門人
馮伯禋問周之謝不受

陸垲

桐鄉縣志字允升領丙子鄉薦就羅山學博捐俸卻餽陞石埭知縣痛懲風弊禁里胥包攬

書勒耗以清節
自甘卒於官

韓子

天啓平湖縣志字心堯以選額入國學丙子魁順天鄉試投德安司理補贛州會直指欲

以意入人罪子初不阿左遷興國旋移蘇州貳守三董漕輓俱絕餽遺額有餘金悉納太倉署篆數月有勸為子孫計者曰老婦守節可中更耶罷歸惟攜書數卷石刻數種足不入公署

孫光啓

嘉興縣志字子昭性孤峻萬厯癸未進士仕比部狡胥暮夜投贖嘗之弗為動與銓期滿

欲薦光啓自代托同舍郎致意固辭曰薦人而使
人知我不作感恩吏部出守惠州摘奸如神贖銀

羨金蠲除不取忤上官以疾歸補延平不赴再補
濟南直指重其氣節尋以異等遷秩行李蕭然治

兵沂州轉參閫
藩清操彌厲

沈道原

分省人物考號淮樞嘉善人苦志積學早有
文譽萬歷乙未進士授樂安令以病歸司教

松江一切贊儀悉行謝絕陞國學尋轉工部主事
值工費浩繁諸所不經悉為汰去轉兵部職方隨
改吏部門無私謁授文選員外郎請告歸
居官二十餘年父所遺田房至去其半

夏建寅

福建通志秀水人萬歷間知安溪縣廉明果
斷不受私書強之則曰偽耳終不發封嘗以

公事行村落蔬食自
攜不廢民間一餐

朱鳳

萬曆嘉善縣志字文瑞司興化訓歷邵武教授
在徽時故人為恤刑使者有囚之子夜謁餽以

千金鳳峻却之邵武有淫祠鄉民賽祭無虛日鳳至以杖擊之曰神明慕淨奈何以血肉腥穢耶明日座傾神亦不靈子愚字汝明少負氣節窮而愈篤後為松江訓導清操頗類其父

湯滌

萬厯嘉善縣志字字新之詩文高古為清豐尹恥干謁將去取印綬置素揖而出行李蕭然有思

菴雜藁
行世

陸錫明

平湖縣志字玉井天啓乙丑進士魏瑞用事廷試前有客諷令往謁正色謝之置二甲授

工部主事出知常州再補徽州徽為富郡商賈徧天下一路相率餽獻求見顏色不可得瑞勢羅織民苦重役思嘯聚竭心力以安撫之陞江西提學副使清節益著以母老乞養歸

國朝

李天植

舊浙江通志字因仲平湖人後更名確號潛夫性樂淡靜杜門寡交崇禎癸酉舉人絕意

仕進日行游九山之麓徜徉自放足跡不入城市安貧樂道以終其身卒年八十二所著有月令詩

梅花百咏九山游志諸書

蔣英

鄉賢留祀冊嘉善人任松溪令課額外有羨贏若干吏以白英正色曰是皆百姓膏脂焉可受

財以備公用歷陞蘇松兵備副使官署肅清日用皆取辦於家交際餽遺一無所取材官某有藏貂

以獻者立召其人還之

俞曾模

公舉事實字存三平湖人庠生係舅氏陸稼書學教授生徒一時名雋多出門下註五經

講解諸子粹言而周禮纂註一書尤能闡明先儒旨要生平孝友因少失恃衰年言及母氏必痛哭

失聲更註孝經以志慕焉動作有範終其身不入縣門里中有古君子之稱

湖州府

漢

沈儀

西吳里語武康人幼有志行九歲喪父兄瑜時亦十歲相與居喪毀瘠外祖盛孝章撫慰之曰

汝兄弟黃中通理終成奇器何遽踰制自取滅性耶後瑜早卒儀長而篤學負雄才屬漢末守道晦默素志不移州郡請辟公車垂召並不屈一時推重謂與徐孺子管幼安同風

南北朝

丘寂之

南史傅琰傳寂之字德元吳興烏程人年十七為州西曹兼直主簿刺史王或行夜還前

驅已至寂之不肯開門曰不奉墨旨或乃于車中
為教然後開或嘆曰不意郅君章近在閣下即轉

為主薄恒以
廉潔御下

丘景賓

吳興掌故字彥先吳興人父康祖任無錫令
歿後僮僕數十人及宅宇畜產悉讓與兄震

之震之推齋屋三間亦不肯受太山孔山士
嘆曰柳下惠之風復見之矣後終奉朝請

沈嶺之

南史傳琅傳嶺之吳興武康人仕宋為丹徒
令性疎直清廉不事左右浸潤日至遂鎖繫

尚方嘆曰一見天子足矣上召問曰復欲何陳答
曰臣坐清所以獲罪上曰清復何以獲罪曰無以
承奉要人上曰要人為誰嶺之以手板四面指曰
此赤衣諸賢皆是若臣得更鳴必令清譽日至上
知其無罪重
除丹徒令

丘雄

南史邱冠先傳雄父冠先烏程人齊永明中使蠕蠕見殺武帝以不辱命賜雄錢一萬布三十

疋雄不受上書曰臣父執節如蘇武守死如谷吉遂不書之良史甄之褒策萬代之後誰死社稷建

元四年車僧朗銜使不異抗節是同詔贈正員外郎此天朝舊準臣父成例也今僧朗返葬塚塋臣

父埋棄絕域語忠烈則亦不謝車論茶苦則彼優而此劇名位不殊禮數宜等乞申哀贈書奏不省

丘師施

南史范述曾傳吳興邱師施以廉潔稱罷臨海縣還惟有二十龍簿書並是倉庫券帖後

位至
臺郎

宋

沈嚴

弘治湖州府志字叔寬德清人大中祥符八年
中禮部第四廷試登甲科監洪州武寧茶場兼

領本邑事吏畏其廉民愛其慈及死貧不能葬太守滕元發葬於縣之永和鄉范仲淹沈嚴墓誌除南康軍判官有善績改宣城節度掌書記時國家興山澤之利主計薦嚴為洪州武寧之茗局外臺上請兼領本邑事朝廷從之君子謂其多善政

俞汝尚

宋史本傳字退翁烏程人議論不苟澹於勢擢進士第涉歷州縣無少營進取之心嘗知

導江縣新繁令卒使者使承其乏將資以公田辭不赴時王安石當國或言汝尚清望可實之御史驛召詣京師知所以薦用意力辭章再上得免還家苦貧又從趙抃於青州遂以屯田郎中致仕優游數年當六月徂暑寢室不可居出舍於門妻黃就視之汝尚曰人生七十者希吾與夫人皆過之可以行矣妻應曰然則我先去後三日卒汝尚庀其喪為作銘召諸子告曰吾亦從此逝矣隱几而

終相去纔十日孫倅紹
興中數文閣直學士

俞澂

西吳里語字子清汝尚元孫也以清介自持官至刑部侍郎求退放意泉石創園於南門外二

里許與小浮玉山相對號曰無塵
時以扁舟往來飲酒賦詩為樂

史祺孫

弘治湖州府志字大年安吉人政和五年以
上舍登第官至刑部郎出典章貢興國二郡

初秦檜欲謀誅岳飛命祺孫搜索其家交游書暨
所厚者羅織之祺孫悉焚書草曰誣人以求榮吾

不為也以是
獲譴致政歸

施鉅

西吳里語字大任武康人舉進士累官叅知
政事清約自持無聲色之好卒年九十一

明

柴震

弘治湖州府志字景春烏程人永樂甲申由國子生授兵科給事中遷至大理寺少卿廉介不

苟人不敢干以私及卒囊橐蕭然

唐海

嘉靖湖州府志字克容歸安人由鄉貢仕至刑部郎中遷福州知府歷宦三十餘年家無帑藏

時以清謹稱

張蘆

弘治湖州府志字孟介歸安人叅政翼之子成化丙戌進士授刑部郎中遇事不避權要曾使

四川封王堅辭餽禮歷貴州按察使

韋厚

嘉靖湖州府志字元載長興人成化丁未進士除貴溪知縣遷黃州同知常祿之外一無所取

後以疾卒於湖之僧舍太守何顯治其殯殮

黃定

弘治湖州府志字叔玠之孫由國子生授吏部稽勲主事轉考功郎中遷山東布政使端重

清約與人語款懇若恐拂人意遇不合則毅然不與之苟同年七十七卒於家

姚岳

通訓長興人治懷寧清介嚴毅布衣疏食宴如也正德丁卯入覲時瑞瑾擅權有司行賄多取

辦於民岳空囊而行民稱其廉有道獻錢者岳曰媚竈以苟容不義剥民以自全不智邵之銓部廉

其清
復任

陳良謨

分省人物考字中夫湖州人嘉靖壬辰進士工部主事改刑部郎再改儀部遼巡郎署者

十年始得湖廣叅議遷副臬考滿叅政貴州致仕歸御史先後薦數四竟弗起為叅議時督太和山鉢兩不私中貴人守太和於誕日袖數百金及他珍物為壽急麾出長跼謝過乃已歸而垂橐蕭然

山田百畝自甘藜藿有巨商介以書為沈侍御居間始心許之徐出千金為壽遽入內竟不復出雖家無儋石儲而姻黨宗族有待以舉火者人以恩施即一飯弗忘也著有天目山房存稿摘稿諸書

嚴杰

烏程縣志字子俊嘉靖庚戌進士授中書舍人拜監察御史為中貴所嫉謫判臨清有部使者

欲致庭跪不為屈還贛州司理不赴歸

吳珣

福建通志字良瑞孝豐人嘉靖間司訓懷安諸生有餽悉不受士之貧者隨力助之時諸生忤

藩司督學欲盡加黜治珣白曰士不可過辱遂止

嚴大節

歸安縣志字字厚漢嘉靖間貢士清介不阿父鳳令分宜以正直稱為南昌郡丞攝府篆出

巡得官米聞其孫在署患痘以一斗見遺大節曰此官米止可官用豈宜入私室亟送還父聞而嘉

之

嚴正邦

歸安縣志號一醇萬厯戊戌進士任太常博士耿介無依附十年不調久之遷刑部主事

厯員外郎執法不撓以清靜稱嘗應詔陳言語切時弊陞廣信知府未任卒貧不能殮同官助喪得

歸著有白雲小言行世

駱從宇

武康縣志號乾沙萬厯甲辰進士厯任翰林官遷禮部侍郎清介中立時魏瑞摧戕正類

從宇遇諸朝不一盼睐瑞客說之拒益峻奪職里居瑞敗晉南禮部侍郎卒

黃雄

貴州通志烏程人進士為普安州守每巡行畧糧自給絲毫無取明察善斷從前積弊一時盡

除

徐應聘

長興縣志字仲覺為諸生勵志好修不苟言笑天啓辛酉舉鄉試益折節自勵誓不請謁

公府身衣布素數年不一易遇公正則昌言之競競名節疾不起至無以為葬人推為真孝廉

國朝

凌焜

鄉賢留祀冊烏程人孝家貧弱妹繼他姓號泣負歸順治戊戌成進士任皖江司李每夜

秉燭平反惟恐失入有宣城富民被誣暮夜投金焜正色却之及廷鞫無辜竟為中雪在任六載勞

瘁卒於官

沈涵

公舉事實字度汪歸安人康熙丙辰進士由翰林歷任內閣學士兼禮部侍郎立朝勤敏謹恪

壬午督學福建入仙霞關普於神曰徇一私者不得歸度此闕閩舊例新進士各出銀餽學使名鹽

萊銀總計約三萬餘金補廩出貢亦各有例涵下車嚴行禁革苞苴干請一槩杜絕有新進生入謁喜形於面涵誠之曰生喜耶吾憂方大耳汝等一有廢業敗檢者皆吾責也閩人服其教將代為構祠烏石山陽涵聞而力止之令別祀閩中先儒及去後閩人卒肖其像以配焉

蔡彬

德清縣志字與端康熙庚辰進士授羅源知縣設義學課士手定甲乙海濱翕然有弦誦聲家

素封歲遣人取資於家以辦官事或家問不至輒仰屋而咨無以代匱也督撫以廉能薦陞吏部郎中

寧波府

宋

曹粹中

實慶四明志字純老定海人中宣和六年進士丙科為李光堦與聞紹興國論丞相秦檜

欲一識粹中粹中時待次無為校官曰吾已有差遣見丞相何為退謂其妻曰吾觀而父與秉權者勢不兩立豈久居此者由是仕不偶自號放齋以著書為樂檜死方以舉主脫選調有詩說三十卷

世行

鄭若沖

成化四明郡志字季真鄞人力學能文與同里汪大猷陳居仁樓鑰相善後三人既貴顯

未嘗一造其門自置書塾聚書數千卷延師訓子雖卧病不廢書家僅支伏臘躬自節約鄰族有急拯之惟恐後方盛年時夢入深塢後營山墅儼如所夢乃字其溪曰夢溪以自號享年七十九子清之相理宗累贈至太師魯國公

趙汝擢

嘉靖寧波府志字待用奉化人廉謹不苟取官至承宣使嘉定五年南安郡西溪洞尹彥

輝跳梁挺身論之彥輝頓首泣謝曰天賜公活我郡賴以平後被命經理新春事搏節有方雖府庫

充實未嘗一開宴瀕行有牙契錢七十緡吏白當得斥不受教官葉逢以母夫人年高為勸汝擢自

指其頰曰鄙陋相豈更望溫飽耶後死無以殮朝廷聞之給喪葬費以表貞白封奉化郡公

史彌鞏

宋史本傳字南叔彌遠從弟嘉定十年登進士第時李壘開鄂閩知彌鞏持論不阿辟諮

幕府事端平初入監都進奏院出提點江東刑獄徽之休寧有淮民三十餘輩操戈劫人財逮捕法

曹以不傷人論罪彌鞏曰持兵為盜貸之是滋盜也推重情者侈數人一道以寧召為司封郎中以

兄子嵩之入相引嫌丐祠提舉崇禧觀卒真德秀嘗曰史南叔不登宗衮之門者三十年未仕則為

其寄理已仕則為其擯
排嶮然不污有如此

趙彥彬

西江志四明人嘉定間為貴溪令廉以律已嚴以御史寬以恤民其座右書曰俸薄儉常

足官卑清自尊及代去百姓遮道攀轅請留涕泣送之廣信府志前此宰貴溪者無庶吏諺語云飲却三山堂下水縱非污者也成汚彥彬曰自愛檻前山有意誰云堂下水污人

陳卓

延祐四明志字立道居仁子登進士第守江州寧國道由臨安丞相欲見之卓謝不往丞相深

器之卒為翰苑李全反淮安卓草詔至淮人益自勵太廟災草罪已詔京師爭感動端平元年以卓為簽書樞密院事未幾丐祠歸里平生不營產業以贊書所酬金築世綸堂退居十有六年年八十有六諡清敏將葬事不能具丞相吳潛聞之為作書闡帥以助

方山京

嘉靖寧波府志字子高慈溪人父季仁第進士為南安軍教授山京登景定三年廷對第

一或以策尾簡短勉令增入山京正色曰吾生平所學在無自欺今既徹上覽將誰欺乎聞者竦敬授承事郎簽書平江軍節度判官時有星孛於井色焰竟天山京適衛文天府用策諸士極言內帑之私公田之擾比出院言者希上意疏劾之遂拂袖歸杜門教子蕭然自適度宗登極徵用得疾不起

陳肖孫

延祐四明志字伯巖奉化人進士以提點刑獄守嘉禾郡帑不妄用絕互送禮餉逋錢二

十萬米四萬子姪合食唯蔬食脫粟人呼為菜湯知府會安吉寇作以措置失宜罷丞相署曰陳肖孫一廡可取當官其子

汪元春

福建通志字景新奉化人咸淳二年以宗正博士知軍事妻子不之官卻例錢不受每食

蔬飯一盂事至立決甫二月而卒卒之日民以金助喪歸其弟與子恐汙之泣辭不受

元

舒莊

嘉靖寧波府志字子臨奉化人性介特以名節自勵至正間仕浙東道都元帥府都事改知奉

化州因方園珍僭號隱居
退避後薦辟竟辭不赴

孫元蒙

嘉靖寧波府志字正甫鄞人嘗為郡庠司訓一言少忤遽引去郡守謝留之不得俾攝鄞

學事食其祿固辭不受家貧僦屋而居講學自給尤篤於倫理與人交久而益敬翰林柳貫黃潛允

素皆重之

明

鄭本忠

角上耆舊傳字本忠少爲學從舒卓受尚書時方氏據浙東三郡擅爵祿人惟本忠與方

遜菴義不受偽署益益杜門讀書同時胡世佐林清叔諸人並相與資益洪武中舉明經不起以薦爲

昌國訓導改泰府保安王教授卒於官有遺集行世

茅維揚

天啓慈谿縣志字維揚永樂乙未進士授監察御史臺中奏疏及諸道讞獄當否皆出其

裁擇歷官至四川按察使所至有廉名歸田之日囊無羨金邑人錢源詩以美之曰山中此日賦歸

來共說清風似寇萊四十二年替鄉多曾無寸地起樓臺

陳治

定海縣志邑人家甚貧志操高潔登永樂九年進士授監察御史清介自守執法不阿後陞河

南按察司僉事風節益勵未久掛冠歸隱官二十餘載囊無餘蓄家徒四壁衣食無以自給子憲永樂戊戌進士授監察御史巡按江西有父風不為權貴少屈一切宿弊靡不釐革時人謂之陳一掃

李山

如嘉靖寧波府志字伯偉鄞人永樂間授兵部郎中忤尚書陳汝言致仕歸隱官四十餘年

清苦一節非奉母不御酒肉貧寒不改韋布比歸抱書甕牖間讀之環堵數椽躬任執作時人稱為擣穀郎中塵生甑釜饔飧不能自給恩詔歲給月食米五石進階朝列大夫及卒有司稟葬事子德字克明讀書能詩文以鬻書糊口

楊範

嘉靖寧波府志字九疇鄞人踐履誠確雖燕居恒盛服端坐讀書至夜分不懈教授里中視世

之毀譽榮辱茂如也永樂間有巫稱龍神道人禍福如響家趨戶迎官不能禁範作文喻之弗止躬

往見巫梓其首匍匐於地時擁巫羅拜者百數十人皆驚悟散去郡守鄭珞邑令張鐸咸賓致以訪政事初號栖芸晚年更號思誠叟

邵玉

兩浙名賢錄字德溫鄞人宣德十年鄉試授汝州學正遷河間府學教授轉順天府學用薦擢

雲南按察司僉事提督學政已乃以足疾納祿歸玉性至孝痛母早喪即官輒萬里必將父以養其教士先嚴義利之辨以身為範嘗三典文衡在山東宿傳舍逢囊金來謁者夫天却之在山西懲前事豫作誓神詩以自見此在江西得人尤多而嚴潔之衷始終如一嘗有鬻首飾者直可百金妻取而玩之輒謂曰汝欲之乎使婦飾百金難乎其為夫矣以清約終其身子莊舉進士仕至按察副使

張愷

兩浙名賢錄字德和鄞人宣德中以太學生補江陵知縣時王府不法愷白守曰王不可繩以

法而吏又不得問宜密聞於朝遂與守列上其事
王遂廢銅遷工部主事周忱撫南畿特奏愷同行
每到州縣輒言愷不可犯松守欲嘗愷以美綾二
百疋置舟中來迎比登舟見之悉封庫欲舉劾守
懇祈得免由是守長皆自重
犯法進常州知府命下而卒

陸珪

天啓慈谿縣志字廷璧正統初授教諭歷常州
泰州封邱令陞遼府長史成化四年乞歸杜門

不出凡二十年里人罕識其面居僅環
堵風雨不蔽善詩有橋南唱和集行世

田珪

奉化縣志字廷玉正統八年進士授刑部主事
持法不阿門無私謁以勤勞致疾疾且亟有指

揮坐重律以白金五百賄之珪不納或勸之珪曰
吾疾且死得無愧於心足矣寧忍以五百金虧平
生志節乎卒之日無一錢之蓄自
司寇而下皆致賻始克殮歸喪

宗顯

嘉靖寧波府志字必彰鄞人正統九年舉人任宜興知縣辨察民冤一介不取人為之謠曰二

三萬戶皆傳說八九十年無此官陞大興知縣厥衛官校見其清苦亦不忍犯陞南京都察院經歷

服闋不樂仕進遂家居貧不能存子佑庚戌進士任刑部員外郎

張文曜

象山縣志奉使外國天順八年進士自少力學任行人

十餘卒家貧至不能治殯

李麟

鄞縣志字仁仲弘治癸丑進士歷官江西叅議恤獄除盜職業振舉正德戊辰入賀至京逆瑾

用事麟絕不與通大忤瑾意罰米九百石瑾伏誅乃釋寧藩傲凌撫按麟不為屈陞四川叅政署理司事有劉太監者奉命迎佛還自成都勢甚張所至糾擾無算麟絕無供餽陞貴州按察使轉布政

使引
年歸

馮志

天啓慈谿縣志字行甫方正寡諧守汝寧懲治藩府以勁直忤上官得河東轉運不踰年歸市

宅僅容膝布衣藿食杜門不與慶弔不履公府有巡按來自汝寧其父老囑之曰為我好酬馮大夫比至浙敦請至會城思有以厚之卒謝不往巡按特造其廬致父老之意云

王汾

天啓慈谿縣志字本源舉鄉貢為歙縣教諭聘校湖廣諸餽遺悉不受陞南豐令監司待之倨

輒詣府乞休時寧海王度為守亦峭直不阿強留之及覲期遽稱病歸當道重其廉不許陞淮安通判鹽院委掣鹽徽商以千金進叱之行縣督稅縣吏以常例進不納既而令因元旦進謁使吏潛投案下而出汾得之亟閉門捕吏令懼請罪汾慰之曰吾忍污君而賣潔耶徐令持物去在淮閱歲竟

浩然
賦歸

秦吉

天啓慈谿縣志字敬夫正德癸酉舉人授萍鄉令歷七年捐潔如一日流賊猝犯境劫帑金五

千邑民號呼令庶安得償爭相勸輸反溢前數不取時監司素重其廉曲為解釋得奏最擢知濮州居數月當入計路費十餘金外不攜一幣亦不謁一人當軸者謂矯矯非人情遂左遷龍巖令又以介特忤觀察意致政歸家居蕭然環堵與劉世龍馮志結社東山各以清節相尚

楊孫仲

天啓慈谿縣志字敬伯嘉靖壬午舉人授儀真令有巨商以珍餽囑閩人密置案席孫仲

見之痛懲屏逐焉自是筐篚絕迹諸郵傳絡繹以孫仲廉無敢橫索秩滿當奏最以忤臺使者竟歸索裝蕭然室無外構畝無旁拓非公事不至邑庭孫守勤曾試廷對皆第一

羅洪

天啓慈谿縣志幼孤事母趙盡孝嘉靖戊子舉於鄉甲辰會試趙文華以郎官分校前數日密

遣人取春秋制義欲陰為之地洪曰得不得命也遂謝去謁選得宿州宿常孔道大吏過無虛日以迎承簡略失貴人意竟蒙謗調河南鄧州後病不起檢遺囊不給舍殮上官聞之賻貲始以觀歸仲子汝學方洪沒時從一老人購柁車老人曰此值百二十金吾感侯德奉以戒衣冠不願值汝學出涕曰感翁義然不敢以百二十金傷先公廬卒不用

秦鈞

兩浙名賢錄字鳴和慈谿人嘉靖庚戌進士授南太常博士故事有事太廟恒宴集中貴與堂

卿南向坐博士東向鈞至見設席拂然欲去中貴曰秦先生難我乎此例也鈞曰非國典誰能遵之自是博士別宴他所著為令晉考功郎當大計持識侃侃冢宰恚曰司官何動相左耶鈞曰某知公

道宜爾不知其他滯曹十餘年不調後晉山東副
臬時性王雅重鋤內艱歸以古硯贖辭王曰姑為
鬱林裝鋤不得已受之比啓函則百金藉其下鋤
驚并硯返之王愧謝服闋補湖廣兵備歷轉江西
左轄乞休歸里居杜門掃軌片牘
不入公府布衣蔬食蕭然如寒士

向程

天啓慈谿縣志字宗洛嘉靖乙丑進士除閩令
徵拜湖廣道御史按遼陽行部至鴨綠江朝鮮

王使陪臣致餼程謝不納神宗踐阼上書言要在
近君子遠小人正蒙養以基聖功經筵進講請復
古坐講禮出按應天復按楚丙子大比時權相子
入試附勢者呈其卷輒批抹之一時讒口間以借
政府立名出為
江西憲副卒官

葛繼宗


慈谿縣志字汝述萬曆元年舉人為建寧令
清苦自勵每催科有奇羨悉貯公府一無所

私久之轉大理評事御史曹學程以直言得罪既下法司復移鎮撫獄繼宗與同官合章爭之得不移陞保寧知府未幾卒於任妻子攜兩破麓歸不能營窀穸遂藁葬云

周昌晉

福建通志鄭人萬厯癸丑進士巡按福建風采凜然墨吏望風解綬去凡有司膺薦者例

有餽金悉却不受後居家數十年淮園自給人高其操



浙江通志卷一百九十

欽定四庫全書

史部

浙江通志卷一百九十三

詳校官給事中臣戴璐

檢討臣

德生覆勘

總校官編修臣倉聖脉

校對官中書臣李荃

謄錄監生臣張士琛

欽定四庫全書

浙江通志卷一百九十一

人物 九

介節 下

紹興府

三國吳

魏滕

三國志 蒯蒯會稽典錄字周林祖父河內太守朗

字少英列在八俊滕性剛直行不苟合雖遭困

偏終不回撓初亦許策幾殆賴太妃救得

免歷歷山潘陽山陰三縣令鄱陽太守

晉

孔安國

晉書本傳 愉會稽山陰人子安國年少諸兄三十餘歲羣從諸兄並乏才名以富強自立

惟安國與兄汪少厲孤貧之操汪既以直亮稱安國亦以儒素顯孝武帝時甚蒙禮遇厯侍中太常再為會稽內史領軍將軍安帝隆安中下詔曰領軍將軍孔安國貞慎清正出內播譽可以本官領東海王師必能導達津梁依仁游藝後厯尚書左右僕射義熙四年卒贈左光祿大夫

孔羣

晉書本傳字敬林有智局志尚不羈蘇峻入石頭時匡術有寵於峻賓從甚盛羣與從兄愉同

行於橫塘遇之愉止與語而羣初不視術術怒欲刃之愉下車抱術曰吾弟發狂卿為我宥之乃獲免後峻平王導保存術嘗因衆坐令術勸羣酒以釋橫塘之憾羣答曰羣非孔子厄同匡人雖陽和

布氣鷹化為鳩至於識者猶憎其目
導有愧色任厯中丞卒於官嗣子沈

南北朝

孔覲

宋書本傳字思遠會稽山陰人孝建六年為江
夏內史為人仗氣不能曲意權倖莫不畏而疾

之居嘗貧罄豐約未嘗闕懷弟道存從弟徽頗營
產業二弟請假東還覲出渚迎之輜重十餘船覲
見之偽喜謂曰我比困乏得此甚要因命置岸側
既而正色謂道存等曰汝輩忝預士流何至還東
作賈客耶命左右取火燒之燒盡乃去先是庾徽
之為御史中丞性豪麗服玩甚華覲代之蓬首緩
帶風貌清嚴皆重迹屏氣莫敢欺犯徙司徒左長
史道存代覲為內史時東土大旱都邑米貴道存
慮覲甚乏遣吏載五百斛米餉之覲呼吏謂曰我
在彼三載去官之日不辦有路糧二郎至彼未幾

那能便得此米可載米還吏曰自來無有載米上水者都下米貴乞於此貨之不聽吏乃載米而去

太宗即位召覲為太子詹事

王思遠

南史王鎮之傳思遠晏從父弟也父羅雲平西長史思遠八歲父卒祖弘之及外祖羊敬

元並栖退高尚故思遠少無仕心建武中為吏部郎思遠以晏為尚書令不欲並居內臺權要之職上疏固讓改授司徒左長史思遠立身簡潔明帝從祖弟季敞性甚豪縱使詣思遠令見禮度都水使者季珪之嘗曰見王思遠終日匡坐不妄言笑便憶卽明士見卽明士蓬頭散帶終日酣醉復憶見思遠言其兩反也上既誅晏思遠遷為侍中及起居注卒贈太常謚曰貞子謹按思遠先世琅琊臨沂人祖弘之徙居會稽上虞已列寓賢故思遠入紹興人物

唐

孔若思

唐書本傳山陰人紹安之孫早孤其母躬訓教長以博學聞有遺以褚遂良書者納一卷

焉其人曰是書貴千金何取之庶若思曰審爾此亦多矣更還其半擢明經歷庫部郎中嘗曰仕官至郎中足矣座右置水一石明止足之義中宗初以若思多識古今凡大政事必咨質以行三遷禮部侍郎出為衛州刺史故事以宗室為州別駕見刺史驚故不肯致恭若思劾奏別駕李道欽有詔別駕見刺史致恭自若思始累封梁郡公卒謚曰惠子至字惟微歷著作郎明氏族學撰百家類例

宋

石亞之

成化新昌縣志石城先生之子嘗禁室讀書於鼓山景祐元年進士唱第時年十七丰神

秀輅天子將以尚主使卜其意辭曰父母老願奉甘旨家已別議姻王姬非敢偶也遂不强仕至太

常博士

趙炎

成化新昌縣志宋咸淳中權刑部員外郎王煥為左相炎責其附賈似道煥乃上言極奏似道

之罪似道遂罷

徐天祐

兩浙名賢錄字受之山陰人以父相恩為將仕郎銓試詞賦第一尉歸安時年尚少即以

吏事稱嘗出郊吏具供帳甚師天祐詰所從出吏以例對天祐曰費出於官則犯法於民則重擾例安可用盡却之貴人居邑者將囑事出謂人曰吾見尉自不敢有所請中進士第為大州教授日與諸生講經義聽者感發德祐二年以國庫書監召不赴退歸城南杜門讀書四方學者至越必進謁

天祐高冠大帶議論
卓卓見者以為儀刑

明

趙淵

弘治紹興府志字澤明會稽人洪武初膺薦為陽穀知縣擢山西按察使去賊吏興學校卓有

時譽及解官結茆先隴之側
旦暮讀書不以貧窶為減

屠任

弘治紹興府志字彥任嵯人家貧好學性耿介洪武中任蕭山縣學訓導陞武陟知縣以廉謹

聞隸卒有餽瓜菜者任卻之曰此苞苴之漸也秩滿以政最擢刑部主事及卒惟餘書篋敝帚而已

薛常生

弘治紹興府志字士容上虞人永樂丙戌進士以母老不敢行遠陳情當道乞就邑學教

諭至則嚴立條約朋舊皆畏憚之歷陞吏部郎中嘗督北征餽餉多効勞績故人陳重器贈絹數端

堅却
不受

陳叔剛

嘉靖餘姚縣志初為縣從事永樂初舉賢良起為吏部主事歷郎中性廉潔在官三十餘

年居處服御如寒士上方屬意大用叔剛屢乞休勉從之宣德中再被召不起有啓蒙故事陳吏部

集行世孫謨舉進士官終提學僉事

蔣琰

萬曆紹興府志字尚圭新昌人永樂間以貢授江通判在官滿兩考一以公廉自持時勅造

廬山廟出帑金萬餘琰用其半餘悉封還於朝用薦擢貴州思南知府清操愈勵嘗於宅傍植棗一

林謂子孫曰吾以木奴牛頭貽汝矣入覲卒於京

張禎遜

兩浙名賢錄字友讓會稽人性剛正清介讀書嚴義利之辨嘗曰我私淑孟軻氏人稱為

張孟子永樂中舉賢良方正授福建按察使照磨
持已慎密克修其職數與上官辨時政得失言論
侃侃不少詭隨上官嫉之不得行其志即引
年返初服一時諸名人競為詩文以高其行

趙魯

分省人物考字尚確山陰人宣德初膺鄉薦歷
任教諭秩滿不調恬靜自如正統間陞國子典

籍日端坐觀書鳴琴自娛祭酒陳敬宗謂人曰趙
尚確仕不近利學不近名對之坐談簡淡有味今
之黃叔度也秩滿致仕行李無
一長物惟囊書數百卷而去

陳金

萬歷上虞縣志字汝礪宣德中由進士任行人
奉使安南厚贖以金金謂天朝使臣義無私交

峻拒不受安南人義之為立却金亭累官廣東
布政使清修簡約丁外艱歸民攀留者填溢衢巷

潘楷

嘉靖餘姚縣志字貴謨舉明經除仁和縣訓導
擢監察御史坐劾逆暨王振左遷通州學正振

敗復為御史氣節益勵尋致仕歸落魄無業飢寒
濱死而未嘗少挫其節從弟英字時彥以進士拜
南臺御史與同官劾奏都御史周銓銓自經
英戍遼陽景泰改元詔復英官而英已死

司馬恂

萬歷紹興府志字恂如山陰人正統中貢入
太學尋中順天鄉試第一拜給事中在職論

事能持大體不為苛察英宗復辟率同官極論人
臣之懷二心者慷慨引義擊刺權奸辭甚切至未
幾選為春官贊善是時石亨曹吉祥內外相要結
朝士多趨附之恂獨簡默自守亡何亨敗附者皆
獲罪而恂竟以叙遷進少詹事兼國子祭酒敦禮
範衆持其科條諸生無敢自便者尋以病乞歸

陳壯

紹興府志字直夫山陰人初從父戍燕清苦力
學慷慨有大節天順間成進士拜南京監察御

史以蕪介稱尋改江西僉事督察官吏雖素所愛
厚無所假未幾抗疏歸李少師東陽重其去有莫

與越人謀出處直夫先謝外臺歸之句歸十餘年
用薦起官福建辭弗許尋擢河南副使甫蒞官又
懇疏乞休壯直道事人志未竟而
退退而為鄉之典型者三十年

黃珣

於越新編字廷璽餘姚人成化辛丑進士歷官
南吏部尚書時劉瑾方進退大臣遂致仕卒於

家嘉靖十年禮部題珣歷事
三朝有清謹名乃追謚文僖

諸觀

西江志字民瞻餘姚人成化進士以工部員外
郎陞瑞州知州嘗自誓曰貪墨之吏猶不負女

一有點汚何以見人時有訟者暮夜饋
金不受卒寘之法後以忤時貴調南安

盛瀧

萬曆蕭山縣志字源之登進士初知臨淮終南
寧守為政嚴明一毫無所染以直忤當道解官

歸行李蕭然抵家杜門讀書不入城市有御史以
巡鹽按浙知其饁粥不繼延之入省飲款甚洽瀧

終無所言一巨商敗法當戍攜千金因瀧子以請
子乘間謂曰父忍兒輩飢寒以死耶瀧曰吾誓不
以飢寒易晚節子悟還商人金相與甘
心不悔越中稱清白吏必曰盛南寧

徐官

蕭山縣志父洪成化乙未進士弟守與官同舉
正德癸酉鄉試官登進士清苦自勵歷廣西僉

事之任不能具裝臨行子請曰家世清白願捐為
後嗣計得許之抵任一載無所寄子復以書請官
還報曰青天白日之下稠人廣衆之中
豈可為此前言戲之耳蕭人至今誦之

王鑑之

嘉靖山陰縣志字明仲以進士知元氏縣有
治才擢御史督南畿學政士咸畏而愛之轉

都御史歷刑部尚書時逆瑾擅權六卿見者皆長
跽鑑之獨與抗禮且責同列曰大臣可屈體於官

豎耶遂
謝病歸

劉忠器

紹興府志字世用新昌人成化初進士出知永安改崇仁擢南臺御史終太平守為人清

苦自勵不可干以私郡有豪宦專持守令短長以行其私忠器待以禮稍有請託輒拒之居鄉出入徒步自登科至貴顯匹馬隻夫不以煩有司或以為舊例當得忠器曰吾無一毫德及鄉里敢勞費耶居常惟以園蔬自給卒之日囊無餘金子孫窮乏不能自振

陶懌

兩浙名賢錄字習之會稽人弘治進士授刑部主事時戚里有殺人者同列並寬之懌曰法者

天下所公豈可以勢屈耶竟寘諸法累遷福建僉事時逆瑾邀賂曰與我不愁無好官懌歎曰不義富貴於我浮雲遂致政而歸

吳舜

於越新編字子華山陰人弘治中選庶吉士拜吏科給事中剛直敢言每彈劾大臣及諸貴倖

不法事無所顧避中外憚之嘗以事觸天官卿竟中傷之免官歸環堵蕭然杜門不出

費愚

萬曆紹興府志字希明山陰人弘治進士初為廷評執法無私時有邊將數人坐失機當刑賄

權貴將釋之愚廷奏其罪悉置諸法後出知成都以忤當路謫戍尋放還平生甘清苦儋石不儲妻子或凍餓不以為意成都人有門人官於浙知其貧甚因請過省中晏款累日微以交關事諷之愚正色曰爾乃視我為何如人即日拂衣歸遂與絕交郡守讀法請教愚曰公刑太苛斂太急守為面赤其介直類如此子思義精於醫端慤有父風惜無嗣

倪鎧

萬曆上虞縣志字右文年二十舉於鄉始授興國學正日舉伊洛淵源課其弟子時四明趙文

華以郎署典山西試事鎧為同考試官趙將有所私鎧庶得之固爭竟不中選遷樂平令三月治聲

大著調繁南城迄二年聞母病即乞歸養居田三十年不入城市日以讀書課子為事著有西原日

紀務本
錄等書

陳壇

舊浙江通志字山甫餘姚人嘉靖壬辰進士由行人轉南給事中劾武定侯郭勛驕恣嚴嵩欲

見之不可出為湖廣叅議歷廣東提學副使海瑞
龐尚鵬方為諸生皆弟之高等行部過厓山改張
弘範立石書宋少帝及其臣陸秀夫死國於此轉
湖廣叅政歸林居四十年讀書如寒士詩文不為
奇崛有
洪永風

賈大亨

萬歷上虞縣志嘉靖戊戌進士初授行人奉
使出入惟著筭砂碓後入臺中歷按湖廣河

南廬鳳淮揚風節凜然河南有卞姓者坐誣大辟
為辨出之卞以厚貲陰謝大亨峻却之歸田日以

所遺薄產與弟姪均之

羅萬化

會稽縣志號康洲隆慶戊辰廷對第一授修撰江陵柄國每思招致託客周生適意萬化

峻拒之其僕尤七私請作記萬化怒曰吾為天子侍從臣而為僕人作記耶江陵又為其子先期請試題萬化拂衣起曰吾晚裝兩篋明日出宣武門而謂我難去官乎江陵益恨之故久不得調江陵敗始遷諭德陞南祭酒歷禮部尚書會推閣臣或言中人須少遺之萬化歎曰吾以單寒被遇至此於吾過矣此何官而可貨取耶又推冢宰而忌者卒沮之復中罷萬化亦瘁病思母連疏乞歸至寶應卒贈太子少保謚文

余增遠

邵廷采余增遠傳字若水會稽人崇禎癸未進士除寶應知縣時劉澤清開府淮南欲以

公禮格府縣增遠投版棄官歸集村童五六人授以三字經旦則秉耒與老農雜作同年生王天錫按浙欲與謁舊增遠擁傘不起曰不幸狗馬疾不能與故人為禮天錫方出門乃與婢子擔糞溉瓜天錫遙望見之歎息而去

金廷韶

舊浙江道志字二如山陰人崇禎癸未進士為江西贛縣令贛營兵變撫道皆不敢出廷

韶頃刻定之甲申後退歸匿影山澤自號恥廬終老不出

俞漢遠

分省人物考上虞人能詩畫常屑保舉寓京師時吏部尚書郭某知其能畫使人召之不

赴召者曰家窄人欲一見而不可得子何獨不往漢遠曰吾以應策而來今往為之畫使他日得美除人將謂以畫得之卒不往後卒旅邸貧無所資鄉人裒金餼之

國朝

魯臬

紹興府志字季臬會稽人明崇禎癸未進士改庶吉士不數月告歸杜門不出

國朝順治十二年

浙江巡按御史葉舟疏薦於朝以老疾辭好讀書雖耄不衰丹鉛甲乙常至丙夜居城

南柳潭杖履蕭然見者以碩果目之兄孫德升康熙壬戌進士官檢討假歸亦以清節著

呂正音

紹興府志字五正新昌人順治乙未進士除昌樂知縣以廉善得民徵入為戶部主事乏

行資父老為治裝悉謝不受典衣而行後以主事出視鳳陽糧儲兼權闕入督寶泉局皆脂膏石職

正音皎皎自持無絲毫染康熙丙午典試廣東遷刑部郎中擢江南僉事分巡徽寧會裁缺歸年七

十五卒

周之麟

紹興府志字石公蕭山人順治己亥進士改庶吉士授檢討歷國子監司業進少詹事左

遷太僕少卿復晉僉都御史太常卿通政使通藉三十餘年謹慎詳密遇事不激不隨以恬和導迎善氣平生嚴取與屏絕華艷服官雖久田宅不及中人見人則握手敘容非素識者不知為朝貴常語其子弟曰我居處服食較諸生時不敢一分增我意氣襟懷較諸生時不敢不十分減人以為名言

王穀韋

紹興府志字鄂叔會稽人康熙庚戌進士歷官淮安知府致仕居鄉有矩矱歲時一報謁

長吏外片牘不至門所從老蒼頭數輩皆衣屨敝敗飭子弟攻苦食淡絕不預戶外事其家法稱越中
最

陳捷

鄉賢留祀冊字穎侯新昌人康熙己未進士選庶吉士授編修幼失怙奉母呂色養備至處兄

弟同仁均愛嘗道拾遺金訪還失者紹興府志丁卯典河南鄉試有勢要暮夜齎金求闕節捷峻拒之其人曉譬百端卒不納悻悻而去榜發多中州名雋磨勘時以三場發策有二程見周茂叔吟風弄月之語摘其瑕謂非考官所當言遂錮級歸

田軒來

四川名官冊字東軒山陰人康熙辛未進士知成都縣盡革支派陋例需應皆出捐辦邑

自明季兵燹後多荒士軒來招徠墾復履畝起科不漏不苛課日增而民力裕俗尚輕生委曲開諭并出示嚴禁有犯者即單騎往驗立行斷結保全善類甚多修學校勤講課多方鼓舞士風以振遏地方大事陳請於上官或不允即義形於色不少改移必得請而後已上官每以鐵長官目之陞戶

曹邑民扶老攜幼泣送百里外擢御史掌江南道
甲午主順天鄉試稱得人假歸家無擔石儲足跡
不入城市日與田夫野老
處若絕無名位之榮者

台州府

宋

彭椿年

台州府志字大老黃巖人紹興進士初授蘄
春縣梁丞相克家薦之未用而梁去椿年即

詣部汪松溪叅政龔茂良奏曰臣備位丞弼每見
朝士希進獨彭椿年退然不營遷樞密院編修官
有私於椿年者曰閣長致意指曰有峻除椿年曰
不識閣長正恐誤耳歷知處州吏部郎中以祕閣
修撰致仕

趙汝掄

黃巖縣志字德澤宋宗室祖不曲由舍選得官清白有厚德泰檜當國投閒三十年紹興

未始除軍器少監汝掄端潔好修初官吳門與韓侂胄有僚窠之好及其專政同時無不貴侂胄嘗

招致之卒不往終知永嘉縣

陳庸

仙居縣志字時中紹興進士終江西提點刑獄以廉介稱解組歸惟圖書數卷而已卒謚忠簡

子章淳熙進士愿官提舉建康崇禧觀有父風時呼小提刑以別於庸

鄭雄飛

赤城新志字景溫仙居人端平進士累官戶部侍郎以清節著

陳宗

太平縣志字正夫堅之子寶祐四年侍御史丁大全既逐丞相董槐益恣橫用事時宗為太學

生與黃鑪陳宜中林則祖曾惟劉黻上書攻之大全怒喉御史吳衍劾之削籍編管遼州時號六君

子

王象祖

台州府志字德父臨海人負異質學於葉水心而與陳貫牕為友和厚嚴重學邃行高守

令欲見不可得真文忠公極重之有故人作相象祖已寢疾猶藁數千言規正之時論比之蘇明允

趙時橐

天台縣志淳祐丁未進士歷工部侍郎咸淳康吏三人橐居其一

林應丑

黃巖縣志字子寅喬年從子咸淳三年發解歷官兵部員外郎上疏攻賈似道引病歸

明

林思英

寧海縣志字嘉睿昇之弟洪武戊午以人材授福建汀州知府居官節儉任五載聞母計

悲悼不已皆血迸流七日而殞觀歸行李蕭然路費不給子尹昭沿途告貸時稱為林清孝云

王敏

方孝孺王進德傳字進德寧海人嘗與友夜讀

聲曰吾在此誰敢入因疾呼使聞於外友愧謝不敢出聲女逸去後學舍諸生相戒不敢為非義分教北方藩鎮主將苦其清介異已欲試其所為召使飲酒坐婦人幃中酒酣鑰門以出敏入見婦人大呼排門出取廢馬乘之逃還主將驚謝後拜御史免歸

魯穆

獻徵錄字希文天台人永樂丙戌進士拜監察御史以敢言稱陞福建按察司僉事理冤繩奸

民目之曰魯鐵面歷都察院右僉都御史以疾卒穆為人剛方蘆介始終不渝歷仕中外二十年被服如寒士卒之日無以為殮同朝卿士咸賻助之

李茂宏

台州府志字用受太平人永樂乙未進士授刑部主事陞考功員外郎永樂之操終始如

一大臣爭論薦之年六十乞致仕歸李文達公嘗語人曰茂宏為人恬澹少許可與人不苟合而疾惡之心太勝以故未至卿佐也

張璣

黃巖縣志字士璇以貢入太學嘗持部檄督宣歙等州筌竹謝絕賂遺授定州同知解內蕭然

如僧舍丁內艱歸再起涿州奏減荒地稅民甚德之扶滿告歸行李惟故篋敝裘察察醵贈以金不受州人呼為乾張

黃尚斌

赤城新志號松塢太平人每讀史至佞倖傳輒掩卷涕洟或感憤至唾罵嘗見人有盜其

困者徻為不知而避之年九十終以孫孔昭貴贈工部右侍郎

郭絳

臨海縣志字仲端成化辛丑進士令績溪以廉幹稱擢監察御史風裁清峻正德己己以山東

叅政管順德府事尋改安慶府介潔之聲聞於遠近迄致政歸行李蕭然歸家杜門如寒士僮僕不能堪多逸去時人歌之曰郊外兒童迎屋裏兒童走廡愛自有真古今郭太守子橈正德進士

蔡餘慶

黃巖縣志字從善成化丁未進士授中書舍人為李東陽所重欲引直內閣輒辭謝陞南

京刑部郎中轉汀州知府廉慎自持恤民疾苦考績陞福建鹽運使益厲清操秋毫無所私惟積圖書數篋當道交薦有獨不廉於儲書之語陞山東叅政未幾以忤中貴人歸三十年足跡不入公門

著有瘦石亭稿燭光錄

王中

寧海縣志字時中成化丁未進士授河南道監察御史陞山東按察僉事弘治中分巡遼東以

邊事與大理卿吳一貫等九人連逮至京坐失奏左遷石屏州同知武宗御極陞同知南雄府當路

以中素著清望特委專理抽分人皆以為錢貨數
中益勵清操傳入皆儲公帑及病革惟一老婢侍
囑之曰吾一閨女也今當歸勿污吾節言訖而逝
昇喪歸至杭闕盤詰者發其囊惟敝衣書卷而已
咸歎曰真天下窮
官也自號夢卜子

葉廷榮

臨海縣志字尚本池州守恩之子成化丙戌
進士歷監察御史彈劾有聲一塵不緇恬於

進取乞告家徒壁立至不能支疾且革當道欲因
事周之家人慫恿終不受鄉人稱其垂死不以一
言博千金守約之
義足以範俗云

林克賢

太平縣志字一中鶚從弟成化丙辰進士授
刑部主事轉員外陞福建按察僉事其在刑

部治獄不為苛刻有既成者錦衣也嘗以大辟屬
克賢讞之知其冤白尚書陸公曰固知錦衣權重

然殺人以媚人某勿為也卒從未減又吏部誣王宗豫投匿名書罪宗豫父淵嘗以言官獲譴衆咸曰非林員外莫能辯遂以屬之事竟得白其在按察力振風紀巡按御史某舞文恣奸嘗面折其過坐是十年不調嘗兩監鄉試御史欲以意黜陟人抗執不從

周玉

臨海縣志字朝振臨海人弘治癸丑進士官祭酒以逆瑾用事致仕歸屢薦不起時論高之家

居三十年恬淡自好曾修臨海縣志年踰九旬而終

秦禮

臨海縣志號樗菴弘治己未進士令常熟直道正辭執節不二先是貴游歸鄉縣盛供帳交迎

禮一切除去歷官刑部員外陞福建按察司僉事剔奸蒐竄稱為秦龍圖弟武號憤峰正德丁丑進士由行人擢御史直諫有聲

蔡德器

台州府志字重之黃巖人領鄉薦授上饒教諭陞靖江知縣廉潔自持皜然不滓靖江故

盜藪民浚河得金銀器盈車以一盤來餽却不受
刷表許御史行部通貨賂吏以白德器曰行苞苴
於權門吾寧考殿不屑為此許發白金令鬻文綺
以諷之執不從許怒欲逐之遂引疾歸行李蕭然
家居杜門掃軌足跡不入公府晚年
布衣蔬食或至不給怡然不以介懷

陳勉

廣東通志字汝勉黃巖人舉人弘治間肇慶同知有文學清介自勵庖無梁肉或以為矯勿恤

也陞太
平知府

蔣泮

仙居縣志字良潔父祿令安溪以清節聞卒於官當路賻贈三百金泮却勿受正德庚辰成進

士授工部主事權稅荊州江陵驛日餽支應銀若干泮行州令貯庫備賑陞員外郎督理倉廩中貴

楊某素聞泮名希交驛焉泮絕不與往來楊慚思
中傷已而跡泮所為曰蔣副郎冰心雪肝未數數
覲也遷郎中奉使再如楚抵姑蘇而卒囊
索蕭然無以為殮郡守胡纘宗經紀其喪

秦紹科

黃巖縣志字弘哲弱冠領鄉薦授海州知州
值旱蝗殫心荒政巡撫席書檄行旁郡為式

陞福建鹽運司同知冰蘖自勵秋毫不緇擢知大
理府首禁輕生之俗多所全活減繇役冗費數千
金有土官欲有所請夜懷金數百伺於途杖而遣
之因榜於廷曰公庭三尺法暮夜四知心大理人
至今頌之居官凡三十年所至一惟節用
愛民執法不阿以是不悅於貴勢坐罷歸

戴時弁

台州府志字貞甫臨海人嘉靖癸未進士殿
試二甲例授京曹有權貴重其名欲致之門

下啖以官職時弁曰結與援以進此吾讀書時言
之而面發赤者今忍蹈之耶以此忤出知亳州未

幾以母老乞養歸後起工部員外授河南按察僉事卒以不善事上官致仕宦故薄不能備肩輿畜一驢以代步墮驢傷足嘗作墮驢謠著有東華文集

林應麒

仙居縣志字必仁嘉靖進士授吳縣令吳多豪右為民患應麒下車輒收訊之會御史苟

汝安按郡應麒晉謁苟端坐不為禮應麒徑長揖出豪右乘間誣之遂被劾已而除國學博士調金谿令尋陞惠州府同知其令金谿時為鄭副使世威屬稿議革餽送內引分宜進賢二邑歲費六千金為證語頗激切嚴世蕃萬鎰諷言者大以他事迺罷歸

張志淑

臨海縣志字世彥嘉靖甲午舉人選授瑞州司李合境稱神明直指巡列郡輒檄志淑與

俱志淑亦慨然以激揚自任墨吏悉望風解綬分宜柄國志淑半刺弗與通遷廣西思恩郡守思恩

蠻獠雜居志淑履郡示以威信衆咸懷之未幾土酋以兵逼城下志淑率吏士奮擊郡賴以安後致

政歸家惟圖書數卷而已

林貴兆

台州府志字道行太平人嘉靖庚子舉人授江西都昌令茹藥飲水始終一轍時嚴嵩父

子秉政大小趨附貴兆曰我豈能為若作鷹犬耶即日解印綬去行李蕭然父老涕泣留之兆別以

詩曰湖邊植柳維官騎柳未成陰官已去慙慙父老莫留衣舊瓢曾掛衙前樹士民為之立祠

周弼

黃巖縣志字文佐性耿介不苟合為諸生縣令方深器之有貴宦廷主師席為求解計者謝弗

往貢京師時冢宰為鄉人諸生進謁率跽階下弼執鄉黨禮平立授恩縣訓導陞卹縣晚歲免官歸家益窶恬然弗問也年八十餘終

孫惟中

畿輔通志寧海諸生隆慶中由永年丞遷清河一僕自隨獨勵苦節士民歸其德化自言

死期適月暴卒檢囊中僅遺錢二百文士民為舉喪甚哀

余鐸

黃巖縣志字振之以貢授崇義訓導邑僻左士陋弗學鐸日與敦說詩書衆皆奮起故事齋膳

夫直率倍徵鐸請於縣革之學旁多隙地募人藝蔬收其稅歸之官屢請歸不許會峽江尹成某以御史檄行縣勢張甚鐸獨與抗禮成陰以盪酒中之坐免不知其不善枯朽也及歸諸生垂涕送之數百里外不能別家居二十年杜門著書後先邑令莫覩其面平生學務實踐不屑近名於紛華勢利泊如也所著有雲屏稿西山集

石承芳

舊浙江通志字子孝寧海人讀書力學無他嗜好以明經授常熟丞邑有梅李地硯因遁

糧往勘賦詩有飛沙迷望遠瘠土不毛同之句涇陽顧公傳之而此城糧額遂減署尉篆民有犯盜者匿勢家承芳卒擒獲後陞廣東興寧令因與府道忤遂辭歸老耕郊送回舟僅餘俸金七金環堵蕭然日以書吏自娛家居十載卒

金華府

漢

陳修

南昌府志字奉遷烏傷人家貧為吏步擔上下恒食乾糧每至正臘僵卧不起同僚飲食虔請

不一赴遷豫章太守計月取俸受米不受錢十日一炊不燃官薪布被覆體金華先民傳修遷合浦太守大著治聲卒於官合浦民懷其忠護喪歸葬

楊喬

娶書字聖達烏傷人桓帝時為尚書風儀偉麗帝嘉其才名尚以公主固辭不聽因不食而卒

宋

徐端益

嘉靖金華縣志建炎初為虹縣尉時張邦昌手書至縣令以下皆迎拜宣讀如常式端益

以武人獨不屈膝事定向子諱言於朝為易文資

朱有聞

浦陽人物記字子益刻苦為學悉通諸家書作文尚質實有理致視富貴無所屈縣令丞

而下欲見之不能得同郡呂祖謙名重一時知其有守而多聞訪之逆旅中再以書速之止修報謝

亦竟不行祖謙愈重之

徐良能

金華先民傳字彥才蘭谿人紹興五年進士歷知宿松安吉二縣其在宿松撫流亡勤勸

課不以土產供餽遺前政私增俸給盡削去之吏
白舊例所當得則曰此賊也爾欲以是餌我耶及
為安吉賑艱食之民除水災之賦民感其惠繪像
於學宮刻石以紀其政去之日衆爭致贖一無所
受待次家貧至鬻產以供以薦起為
御史遷給事中除龍圖閣待制以終

黃中

輔

萬曆金華府志字槐卿義烏人紹興中秦檜
和議既成日使士大夫歌頌太平之盛但有

言其奸者輒捕殺之中輔作樂府題太平樓有快
磨三尺劍亟斬佞臣頭之句檜聞大怒踪跡不得
而止居鄉每為仇家所挾將發之會檜
死乃免自號細高居士名其齋曰轉拙

陳黼

東陽縣志字斯士少從呂東萊遊永康林大中
聞其賢妻以女黼未嘗倚為重也淳熙八年登

進士不汲汲進取以恬靜自守林欲召為樞密院
黼力辭嘉定元年大中卒乃遷國子博士著作郎

凡三十年偃蹇宦途而不改其樂後
丐祠歸貧無室廬就居永康以終

金式

嘉靖金華縣志字元度淳熙十一年進士以右
正言終在官三十年清貧如一日輩豐狀其行

謂金華
之人傑

倪千里

兩浙名賢錄字起萬東陽人七歲能默誦九
經諸子登淳熙進士議論文墨藉甚開門授

徒戶外屨滿擢御史公饋不入門退食蕭然如山
居遷右正言以言事忤大臣除起居舍人兼國史
編修實錄檢討卒於位特贈
右文殿修撰階朝奉大夫

胡侁

金華先民傳字子先永康人寶慶進士累官監
察御史內侍董宋臣竊國柄侁屢疏劾之宋臣

怙寵奪侁言職調將作少監即日棄官歸稍治田
園自給泊然不復以勢利經心後累召之堅卧不

起又稱雲岫先生
著有考經論語釋

元

王餘慶

金華先民傳字叔善金華人受業許謙之門
嘗遊京師有番僧官為總統者勢焰烜赫得
其一言官爵可立致或以其名聞僧召之拒曰吾
學將以伸正道寧有屈身而道可伸耶至正初入
經筵為檢討官累拜監察御史使廣東詢問疾苦多惠政

吳中

東陽縣志字子善少從陳熙遊熙卒從其母獨
居陋巷間家貧年三十不能娶不以介意每鼓
琴自娛或把筆吟咏宋學士濂
與善卒為之銘以固窮稱之

明

馬蘄

分省人物考字原清東陽人幼有志操博通經史洪武初薦授德清丞招徠流離撫綏凋瘵甚

得民心既而調丞壽陽有候卒於廢寺得埋金五十兩以進蘄命簿錄其數藏於官庫後厯遷山西

副使謝獄詳明民無冤滯以親老謝政詔進一階致仕卒

鄭子祥

金華賢達傳浦江人義門疎族也嘗為義門師塾洪武中薦授知縣守職蘄平謹畏自持

或賂以賄毅然曰吾為義門族可使簞簋不飭玷吾宗乎

陳俊

兩浙名賢錄字俊民東陽人永樂乙未進士除監察御史巡按南畿劾賊吏革宿弊郡邑肅然

累官應天府尹以嚴峻繩下吏有舞文者即杖殺之處同僚不阿以私嘗曰吾不能自立清流然隨波汨泥吾不為也未幾卒於官貧無以殮

童俊

正德蘭谿縣志字邦英由舉人知嘉定又知趙州因內臣王振巡歷其地不肯折腰遂致仕歸

民攀半泣留不得立生祠祀之歸家饗殮不繼遂撤其几以易米但以手持卷門人問曰何居曰將

以辨早尉耳日夕考索經傳作書韻會通若干卷

聊讓

豫章書字公遜蘭谿人景泰進士天順中知南昌縣守禮執法不徇上官意時鎮守中官恃恩

恣橫有所苛取讓即納冠帶求去中官愧而留之自是不敢有加於讓

胡節

分省人物考字孟通浦江人天順舉人授淮安知縣為一時廉能首值外艱歸行李蕭然邑人

欲贖以金堅拒不納乃建却金亭於西禪驛之渡口自恨勿克終養廬墓而卒

黃傳

蘭谿縣志字夢弼從章楓山遊以名節自勵弘治庚戌進士授江陰令稱神明三年授御史朝

貴聞其風裁相戒敏避不久以病歸病劇無資以供藥餌家人尤之傳賦詩曰病餐藜藿神猶壯餓死溪山鬼亦清所著有白露集及江陰志

姜芳

兩浙名賢錄字實夫蘭谿人弘治中領鄉薦數上公車不第授廬陵教諭以名節為訓應聘校

試於闕或有以私求舉者峻拒之居憂起蕭縣歷陞大理寺司務未幾逆瑾竊權流毒縉紳芳慨然以不得行其志為恨遂乞休歸蕭然一室下捷讀書微疾能自知死日具永冠端坐而逝嘗自志其墓曰吾以魏世之好諛者

李滄

金華先民傳字一清永康人正德戊辰進士授南工部主事嘗奉差督覲儀真及司龍江關抽

分廉慎有為人不取以私干雖中官同事者亦嚴憚之公暇輒與崐山魏校永豐夏尚朴講學窮理

以求檢身之方一切世味泊如也卒於官貨所乘馬乃克斂鄉人高其風操率私錢為樹坊以表之

章楓山題其額

曰清修吉士

姜綱

萬曆金華府志字幼章蘭谿人性剛介由進士任南刑部主事嘗請除方遯志奴籍理高介夫

冤訟以議大禮與時宰不合呂涇野官武選於稠衆中問及同鄉能詩文者綱不應呂前席復詢答

曰德行本也詩文末也本之則無如之何呂改容謝之轉工部營繕司郎中剔蠹斥奸為吏卒所憾

共誣搆用官物下錦衣獄尋得辨釋落職家居淡薄自守不預外事亦不以營家為念植方竹於庭

自為贊曰方不就曲竹不諧俗知我罪我其惟方竹遂自號方竹著有鳳林類稿經史等記若干卷

朱方

永康縣志字良矩正德甲戌進士歷官雲南副使進右叅政性誠樸言笑不妄舉進士時年三

十九或勸以隱年方曰初學事君即可欺乎初令泌陽官道傍植柳歲贏千金方不取後邑人復追餽於丹陽亦弗納在淮安代守入覲諸屬邑供送行齋俱峻却守贐以履襪亦却之守書廡吏二字以贈在雲南凡八年從惟二僕一榻蕭然

章适

分省人物考字景南蘭谿人嘉靖進士授行人擢禮科給事中言建儲忤上旨風節凜然未幾

引疾歸家無羨儲依然一布衣也

鄭宗錦

浦江縣志字世章為石阡司理清介不苟取日以孝弟訓其民比歸家徒四壁無以自存

為塾師以給朝夕邑令或憐其貧捐鍰以贈不受從子崇憲為清江丞清操克紹

徐址

萬應金華府志字叔明蘭谿人家素貧既舉於鄉絕不以家計為念嘉靖癸丑成進士授南刑

部主事靖共厥職甫八月卒於官至無以為殯

徐用光

蘭谿縣志字仲孚嘉靖進士授工部主事陞員外郎督臨清甄厥中貴往來河道有肆橫

者每折之不可干以私厥賈給發金錢數十萬故事割贏佐公費用光一切謝絕遷郎中道病行李蕭然窰戶猷贏金為湯藥資輒指衣曰我如此衣耳何以墨污之亟持去不數日而卒年僅三十有

五著有徐工部詩集

金傑

湯溪縣志字世英嘉靖丙午舉人授廣西富川令居官六年一介不取時權相當路傑不事賈

緣前後薦章凡八上乃擢江寧尹甫三月歸三十餘年足不履公府有肆隱通集行世

胡釋

分省人物考字仁甫蘭谿人由舉人歷邵武長沙建昌三府通判陞景州知州真定府同知所

至廉謹練達人以法家老吏稱之致政歸讓產於兄弟至已不能自存

李學道

東陽縣志字汝致萬曆壬戌進士授丹陽令邑有羨金至則籍而歸之官以父憂歸貧不

能具喪授徒自給在丹陽嘗雪一冤獄既歸其人以百金壽謝卻之服除拜監察御史巡視中城中涓爭治室蓄倡童牟非分利悉逐去之內相許義狀必關入民家取財物按治之繫諸獄諸涓聚午門俟罷朝邊而蕪辱之御史大夫以下俱上疏論涓逮首惡三人杖發邊戍學道亦外調司理廬州已而擢南兵部主事進職方郎中承重歸服除補山東之青州入覲卒

陸可教

金華府志字敬承蘭谿人萬曆丁丑進士改庶吉士授編修尋掌誥勅使者餽遺悉卻之

擢春坊諭德為經筵講官時朝廷久不御殿因為十二頌首列聖訓疏入上感動下罪已之詔奉命

主應天試有司援故例餽金堅辭不受
抵京擢祭酒陞右宗伯遭父喪哀毀卒

鄭弘道

蘭谿縣志字克修性至孝七歲遭親疾治湯藥永不解帶萬厯甲辰成進士授徽州府司

理有士人投謁門牆贊以一硯試之則紫金也立
召至卻而絕之俸入不足以供日用室人歎曰為

廉吏婦自甘淡泊亞旅不能宿飽奈何弘道巽言
慰之攝郡篆餘羨數千金不入私橐為造紫陽橋

利涉者感之號鄭公橋又攝休歙二邑羨贖所積
幾萬金悉以葺泮宮資貧士調南雄去行李蕭然

徐可期

永康縣志字烜父崇禎戊辰進士初授行人
奉命冊封蜀藩屏供帳省夫役蜀藩以金帛

贈行堅辭不受又奉命諭祭豫藩清望益著考選
福建道御史以鯁介觸忌改刑部主事時山陝寇
起大臣多無辜被逮可期力為申救
乙亥病卒於官同官賻之舉柩歸

國朝

倪懋祚

四川名宦冊金華人康熙庚戌進士宰隄為不名一錢致政歸民餽以贖置之江干不受

而去

衢州府

宋

王介

萬曆常山縣志字中甫言之子博學善屬文慷慨負氣喜直言慶厯進士嘉祐六年策賢良方

正直言極諫之士介取上第後以祕閣校理出知湖州休致卒於家初介與王安石遊甚款及見其新法乖謬遂與之絕子漢之渙之沈之弟愈愈子為之皆舉進士

樊澥

崇禎衢州府志字德潤西安人元符進士徽宗欲用之以不附蔡京出守鄱陽後奉祠老於家

毛抗

正德江山縣志字節之登甲科時新法行抗持論不合去終祠部郎

柴天錫

崇禎衢州府志江山人仕為司封郎中時蔡京當國鄭居中說往謁之天錫曰曳裙權門

吾弗為也

明

汪益民

弘治衢州府志開化人元季不仕洪武初詣行在獻策陳開國網紀朝廷嘉納之尋召赴

闕授慈利縣令守官廉介任滿乞歸上憐其貧解御袍賜之仍命有司優給衣食

蔡德政

萬曆龍游縣志永樂初舉明經擢福建道御史彈劾不避權倖嘗曰張綱埋輪彼何人耶

吾紳

嘉靖浙江通志字叔縉開化人永樂甲申進士授庶吉士改刑部主事陞郎中文學政事為時

所稱官至禮部右侍郎仕官二十餘年蕭然如寒士

胡超

萬曆龍游縣志字彥超舉進士授都水主事改虞衡奉使華陽饋遺皆不取強之勉取其一出

投之江人以投金名其處判通州盡剔宿蠹尋乞骸歸弘治初歲給米四石子授舉人

吳夔

崇禎衢州府志字學夔西安人弘治舉人為永春教諭士有惜別頌調離縣士有難得歌致仕

家居僉憲韓邦奇夔之門生分巡三衢龍游胡癩頭以罪求釋遺數百金峻拒之嚴守喬遷亦門生治西安梁宰獄梁以二百金求囑復拒之性孝友吮母疽父喪廬墓郡守沈杰請總緝郡志

汪璫

開化縣志弘治間以貢授古田令下車誓不取一介時當路有欲橫征者璫獨不奉令曰吾不

能剝民脂以媚人遂托疾歸家居二十餘年絕跡城市一日有友人謁邑令借冠於瑑瑑取冠彈曰此冠不屈於人久矣友悟歸其冠亦不往謁

周文興

分省人物考字字用賓江山人正德進士甫登第即疏歸讀書於江郎山中八年起為刑部

主事厯官鴻臚卿屢起屢退前後實厯不踰二考舉朝重其恬退特越次遷之逾年致仕愛杭郡山水之勝築室清平山下與人交樂易無城府放言高論意豁如也總督胡宗憲表其里曰高士坊

汪嘉會

衢州府志字亨夫開化人正德辛丑進士為刑部主事陞郎中事繼母甚孝恬退清守不

苟取不競進審錄四川多所平反楊石淙以公平仁恕薦之未幾卒於家

周任

江山縣志字以仁幼事章楓山登進士時逆瑾用事誘以殊擢不聽乃外謫尋陞刑部郎武宗

南巡陸震以直諫下獄抗疏救
之後出守梧州以勞瘁卒於官

陸郁

崇禎衢州府志字文盛西安人歲貢生令湖口
時值宸濠之亂州縣被收印篆郁佩印死守卒

免卻漁船常例金秩滿啓行糧長積每歲常例二
百金餽以供路費毅然却之在任八年每食蔬素

人稱陸青菜後任
鹽運使政聲尤著

陸瓚

萬曆廣東通志龍游人進士嘉靖中知雷州寬
簡臨民尤勵苦節時當入覲故事有夫馬供億

瓚一切罷去及所餘贖錢皆蠲除之
在官三載不攜家屬歸途行李蕭然

楊希聖

崇禎衢州府志字恒初西安人萬曆戊戌進
士官翰林編修攻苦茹淡飯止脫粟衣皆布

素奉差道經武林織匠
以千金求囑怒而却之

蔣士臯

開化縣志字仁宇六歲失怙事母程以孝聞
任奇嵐州吏目萬厯庚戌歲大饑委催軍餉

甚迫徵急則應民變餉遲又懼軍譁士臯請暫停
徵兩月支五寨所儲馬料代餉知州難之馳告本

道力請始得允軍民兩便致
仕歸杜門課子家無長物

翁祚

龍游縣志字子長少遊吳中與張西銘楊維斗
張受先諸人友篤學嗜古終老不輟家無擔石

儲處之晏然不問家人生產有言及阿堵物者輒
面發頓揮使去每歲教授生徒束修外雖片楮寸

管亦不妄取丙
子選貢不仕

國朝

方輔圓

開化縣志字左一順治間由監生知臨汾縣
時查壑令下上官恐有隱匿催提旁午里胥

欲增畝以爲守令地報贖盈三千輔圓集士民謂
曰奉文查隱漏非增稅畝也今若此是遺爾民無
窮之患且非朝廷愛養爾民之意矣聚贖焚之外
艱服闋補合水令地瘠民貧鬻邸第以代逋賦民
德之忽一日心動遽乞養歸士民泣送數百里外
抵家而母病已劇奉湯藥三日而歿卧柩側三載
終喪杜門不出垂三十年絕不聞戶外事有福建
流寓持三百金求冒墾戶應試堅拒不納事乃寢

嚴州府

宋

陳彥才

竹坡詩話字用中平陽人宣和進士居官廉
靖以不附秦檜終不大用有述懷詩晦翁跋

之紹興初嘗有故相寓永嘉彥才雖鄰不
謁也後其人再相彥才僅注邑連江云

洪璞

嚴陵志字叔玉淳安人為鎮東節度推官遷印武通判慈湖楊簡薦之朝曰守官數十年而無

屋可居舉家三百指而無田可養節操方正可備獻納科未報而卒所著有省堂文集

方恪

嚴陵志字德奎淳安人以春秋領鄉薦仕祕閣校理耿介自持時貴忌之乃棄官歸

童堯民

萬曆嚴州府志遂安人登紹熙四年進士第累官至右正言以言事忤韓侂冑罷歸

俞誠一

嚴陵志字則明分水人嘉定十六年進士累官南康教授兼白鹿書院山長淳祐七年遷

國子監丞磨勘轉奉議郎平居喜怒不形遇事剛果不為禍福怖自奉儉約菲衣糲食破窻敗几澹

如也居家莊官內外如一著南疇集十五卷

徐唐佐

淳安縣志字君輔咸淳四年進士歷衢州教授至行在權院官生平力學自奮未嘗隨俗

俯仰晚年居家貧甚操行峻潔為後學師表從弟
夢高字明叟學尤精粹教授衡州有菊存稿一卷

明

盧義

嚴陵志字希正淳安人洪武進士累官刑部郎
中出知建昌府以誠確愛民稱盧慈悲然寬而

不縱豪強有所犯不少貸且曰今不慈悲矣秩滿
民惜留復任九載當遷以疾辭歸囊無餘貲吏部
侍郎洪興嘗寄以詩云袍笏賣來供
國賦詩書留得當山田蓋實錄也

洪堪

淳安縣志字子興洪武丁丑進士授監察御史
以年少辭俸冠豸暫歸候長永樂召入臺彈劾

不避權要同寅有遺雙白鵬者堪却以詩
曰白鵬本是山中物何事飛來到柏臺

胡拱壁

淳安縣志字寶之號更拙穎敏好學經史百
家皆貫通大旨恬淡閒雅不以紛華易志兄

莊懿公既貴顯拱壁愈韜晦邱園足跡不履公府
邑令特加禮敬終不能致家居惟讀書吟咏以孝
友忠直為素履六十年不變所守縉紳咸重其品行

陳道

建德縣志字霽宇事繼母以孝聞撫幼弟不欲
分著盡以腴田歸之充萬厯癸巳貢授廣西遷

江知縣縣界安南苗民雜處有豪苗陸轉者殺傷
差胥諸司欲勦之道執不可乃單騎入陸村諭以
順逆擒陸轉一人置之法餘衆得全安南人聞道
名餽金十三條峻拒之其人已越界去道呈之撫
按以其事聞有旨令安南人前來領金以彰其
廉扶滿陞王府長史致仕歸淡泊一如寒士

吳希敏

公舉事實字魯卿淳安縣學生崇禎中以薦
授四川大寧知縣未至任而卒年十四時到

股療父疾父卒事母至孝及長兄希哲以進士官
司李於粵希敏至其署越數月告歸瀕行兄贈以

金希敏笑而卻之曰弟不憚數千里為省兄來非
為分潤來也辭不受與人交一介不取里稱為行
君子云

溫州府

宋

王公彥

萬曆溫州府志字成德永嘉人與兄公輔同
登紹聖第調江夏尉元符末上書論宣仁無

負於先帝司馬光無負於天下且言章惇悞國之
罪與李林甫盧杞無異由是廢斥入元符黨籍紹

興初褒錄
轉官奉祀

徐履

嘉靖瑞安縣志
第一時秦檜專權力主和議朝野側目履不勝

字子雲尚氣節紹興戊辰省試

憤怒及聞檜欲以女妻之廷試對策指斥其奸朝臣視之愕然高宗憫其懇直特置榜末歷刪定官國子博士終朝請郎所至有聲止齋陳傅良嘗曰吾鄉徐少初天下士也

顧岡

平陽縣志字次鳳紹興進士授錢塘簿時趙鼎去位秦檜擅權力主和議盡斥不附己者岡深

憤歎因致書其鄉人工部侍郎蕭振極論二相邪正之黨遂不復仕

徐瑄

萬曆温州府志字純中定子由評事積遷朝奉大夫大理少卿濟郎獄興史彌遠囑其傳會殺

無辜啖以美官瑄不從削秩謫道州卒端平改元詔復原官贈集英殿修撰命有司立勸忠坊於第左

邱何

兩浙名賢錄字漢規瑞安人乾道二年進士宰連江有聲部使者交薦不自售由是浮沈州縣

晚始登朝監進奏院遷太府簿時方詆道學何獨
奏疏論中庸及皇極偏黨之義語意懇切慶元丁
巳將有事於南郊太常缺卿丞肆儀宰相以何名
聞遂攝卿行禮自受誓戒至飲福細大無違以不
肯謁當路出
守袁州卒

夏祐

江西通志永嘉人由進士嘉定八年尉上高以
廉介自持有委一斷以公未嘗通當路嘗謂人
曰仕途奔競相率成風吾竊恥
之窮達有命豈可枉道求仲耶

曾鼎臣

永嘉縣志調儒篤氣節許及之
嘗奏以官鼎臣恥附之辭不就

徐儼夫

兩浙名賢錄字公望平陽人淳祐辛丑廷試
第一歷官館閣以忤丁大全拂衣歸里杜門
不出家貧并日而食抱膝高吟聲出金石或勉其
抑已謝過儼夫笑而不答景定中起為禮部侍郎

趙時訥

樂清縣志立夫子為浙西憲時道經太湖遇賈似道還京邀之引舟避去後為太府卿又

數忤之遂貶融州貽書諸弟歎國柄下移冀有為以行其志遂卒

明

任道遜

溫州府志字允誠瑞安人七歲工書永樂中以奇童應薦歷官太常卿致仕居官五十餘

年囊橐蕭然日以詩畫自娛與吳祚蔡昂結清樂會倡和吟詠年餘耄耋卒有太極心性圖說歸田

百詠諸書

范霖

溫州府志字時雨樂清人宣德丁未進士以行人使萬里外歸篋蕭然擢御史彈劾不避權貴

時都御史周銓苛刻貪暴霖惡條其不法事合十三道共劾之有詔逮都御史銓心悸自經十三道

謹請霖係首議下獄擬大辟霖了
無怖色會詔恤刑乃減死出獄

陳鈍

萬厯温州府志字斯鈍樂清人以孝行聞正統

毫無所受凡再進再却且諭以詩有天使非關賄
賂來之句朝鮮人相顧動色進吏部文選郎中遂

乞休有
全歸集

陳宣

萬厯温州府志字文德平陽人成化辛丑進士
授工部主事治徐沽頭等閘漕商兩便陞刑部

郎中以同列章震事連坐謫夷陵州其俗女耕男
織信巫事鬼宣教以男耕女織崇祀祖先俗遂雅
化尋陞河南知府毀淫祠十數創二程祠署後多
曠地散步園中見一僕揮鋤有聲令掘之得藏金
即白之臺臬盡以其金充邊
餉晉雲南左叅政乞休歸

王朝佐

平陽縣志字廷望弘治丙辰進士授南禮部主事遷工部員外居官清貧父卒不能葬郡

人張孚敬知其賢為言於郡守徐宏賻之金始克葬所著有蛟川集東嘉先哲錄

鍾城

萬厯温州府志字又獻瑞安人以例貢入太學授鉛山丞六年考績擢本縣尹清謹一節不畏

強禦以忤權貴引疾歸林居結社賦詩以終

章朝鳳

萬厯温州府志字鳴仲樂清人恭毅綸曾孫嘉靖甲辰進士任刑部主事陞福建僉憲轉

廣西叅議厯官十餘年常俸之外一無所取在閩表章龜山延平諸儒及新李忠定祠謝病歸屏居

山中不入城市

朱廷謚

萬厯温州府志字司理少孤力學為士林所推嘉靖乙卯舉人授藁城令廉謹自持而拊

循特至及期政聲藉甚北地苦寒念母老弗克迎
養中心鬱結既聞訃邑民泣留出百金以贖回却
之竟哀毀卒
藁人祠祀焉

林宗教

永嘉縣志字希道嘉靖戊午舉人任永福令
遷貴陽府判尋投牒歸宦橐蕭然家徒四壁

敝衣蔬食
恬如也

張陽春

福建通志字文復永嘉人進士知尤溪以清
白著出贖鍰改建學宮卒於官無以為殮

趙嗣薦

樂清縣志字似川萬歷丁酉舉人署壽州教
諭捐俸葺學周恤貧士陞廣西太平司理崇

禎元年取天下清薦第一進京時相溫體仁重其
名欲延見之竟不謁遂授漳州同知冰節愈勵時
有尹大使以金密進
責而勿受卒於官

處州府

宋

吳昇

慶元縣志熙寧癸丑進士教授峽州學士翁彥深知其名謂之曰以先生學問操行宜居太學

之選以範多士與遠處湘湖哉昇笑曰吾道其事干求耶他日出一書示彥深曰吾將以此書干丞相范公深怪其前後語不相符啓其書則以大義責范公不能用正才以興起太平徒取法度紛更之語也

管師常

龍泉縣志熙寧間舉遠民名試賜進士第授校書郎知江陵府監利縣事時天下方以苗

役新書為政州縣上下咸趣辦師常獨置得失與察訪使抗論可否人為師常危之後去官道出安

州應城無疾而逝初居白雲巖自號白雲翁有集行世

孫薪

蓉塘詩話麗水人字至豐元祐中以明經擢第授荆門軍教授不赴絕意仕進與黃葆光為太

學舊遊宣和六年黃以侍御史出守處州薪不肯詣郡謁見黃約以勸農日會於洞溪僧舍至期薪以扁舟來會時有里胥欲賂黃而無由將因薪納之俾薪家僮導意薪叱曰無語使吾聞此便是入耳賊年八十卒

周綰

括蒼景紀字彥約瑞昌人崇寧五年進士五剖符持節再領大藩為吏部侍郎以數文閣待制

致仕始終以
廉節著名

吳詳

兩浙名賢錄字守約麗水人崇寧間為蘇州教授高簡自持不為貴勢所屈時中貴朱勔以花

石綱住蘇州勢焰薰灼有司脅息奔走如屬官詳獨不屑見之及為福建路茶司提舉以廉著名入

仕四十年無一稼以庇風雨子祇若登紹興進士

胡升

兩浙名賢錄字子上麗水人博雅工文辭初任彭澤丞終湖北提舉紹興初郡將耿廷禧創熱

門委謨上梁文并記刻石畢以錢十萬酒百壺餉之辭曰升雖貧終不為一釰門所驚

閻邱昕

嘉靖浙江通志字逢辰麗水人知溫州時有秦檜親黨薛某為郡丞承檜密旨俾造漆器

昕不從薛怒詆秦相黜之昕嘗憤權臣專政作周易二五君臣論以排用事者平生不殖產至無宅

可居郡守馬光祖建祠祀之扁曰清風

程榆

隆慶松陽縣志字森之九歲能屬文既登第孤介特立恥事嬖阿宰玉田真西山疏其天資靖

重心術端良有古循吏風不報嘗倖鄭史彌達挾勢干請榆却之後持廣左憲節彌遠以風忿風言詆毀榆安命不易志官至中奉大夫謚曰安節

吳淇

慶元縣志嘉定甲戌進士時相欲以淇為監察御史淇以臺諫不宜出宰相薦舉抗不就職忤

當道出知南劍州

吳懿德

崇禎處州府志字夏卿慶元人嘉泰二年進士知玉山縣改新會每新令至有給繇錢受

訴牒者有酷息錢一切罷去進廣州通判未及赴而卒將卒前二日書於冊曰平生薄宦每受凍餓一介不取一毫不私嘗祀晉刺史吳隱之於縣東邑人以其無愧遂配享焉

潘大臨

隆慶松陽縣志字舜舉嘗以兩浙運司主管文字官攝温州獲海寇釋無辜者半復以太

府寺丞出權真州茶鹽時丁大全使人諷之曰有
羨獻即受賞大臨曰吾一錢皆籍縣官羨餘何取
大全怒馳代者夜半
奪印去後知廣德軍

毛蘭

兩浙名賢錄字君玉松陽人資性簡默官福州
司理時宰相趙汝楨之黨曰林冕者有罪下獄

使人夜懷金私之蘭正色不受復賄當道者以威
恠之不動卒坐冕以法汝楨聞而歎曰蘭持法如
此何有廷尉乎後召蘭不果行累官
二十載歷叙凡九考居最止承直郎

趙崇潔

縉雲縣志字敏則累官右司郎官每以人才
為宰相薦理宗朝中貴盧必升等專權無一

人敢言崇潔乞罷斥以肅官府自是名振
朝野居官不受私謁所至以激揚著聲

明

楊仲吉

崇禎處州府志麗水人洪武中辟至京師上問在家何為對曰春耕夏耘秋收冬則教子

讀書通義理特授崖州知州及歸惟衣被而已

戴銓

括蒼縵紀字文衡處州衛人由歲貢授鹽城訓導值歲歉當道命監賑至興化得銀九百兩縣

官請分銓毅然拒之悉以賑陞益都教諭兩任皆入名宦

金祿

括蒼縵紀字從吉麗水人信仲子力學篤行十歲過母疾顛天求代母病革粒食不入口者三

日與兄祥弟裸自相師友以貢授雲南永昌府判慎守官常嘗承檄撫安干崖隴川酋長餽以白金良馬拒卻不受謝事歸杜門斂跡賦詩徜徉自適卒年八十八著有易意白湖詩文集

周德琳

遂昌縣志字廷獻由進士歷刑部郎中庶謹平恕不阿權貴正統間清理江西刑獄多所

全活陞雲南布政司叅議時宦官金姓者
要其一見以美官誘之卒不往遂乞歸

金忠

崇禎處州府志字尚義麗水人天順甲申進士
授監察御史使車所至聞者披靡值星變疏陳

三事皆人所不敢言者事侵權貴坐是中傷繫獄
謫戍遼東怡然就道杜門著書有甕天稿東甌童

吟子

陳中州

青田縣志字洛夫詔之曾孫以貢為廬江教
諭復除玉山以興起人文為任往與永嘉張

少師游及上銓選張令作清馥賦將薦授館職不
就作詩諭意曰上馬伏波猶未老下車馮婦也堪

羞人稱其氣節歸結一室
依古木下自號依樹老人

葉雲

崇禎處州府志字民望遂昌人由歲貢除江西
建昌府推官為人砥礪名節居官廉介捐俸修

曾南豐祠執法忤當道懇致仕居家甘貧有司以
蔡相公廟基地遺之計直數十金辭弗受今湖山
所建風池書院即其地也

李鍵

舊浙江通志字廷守縉雲人嘉靖丙辰進士任
工部晉光祿少卿抗疏陳職守十事頓革靡濫

擢南都給事以持宗藩事儀忤權要左遷守蘇州
有飲吳水之謠入覲無餽遺因議官屬復忤執政
遷長蘆驛使冰蘖自持至今商人春秋祀之晉四
川大叅念親老愿疏乞養歸卒年九十一著有賜

養堂

詩集

李寅

縉雲縣志字敬之由進士厯廣西布政誓不取
一介搜應得羨餘銀一十三萬解部無私告歸

行橐蕭然壽一百八歲臨終作詩云身曾許國生
無補恨不除奸死不休其志節可見矣著有賜谷

空音

行世

葉溥

錢輔通志龍泉人嘉靖五年知大名府剛介自持寡言笑人不敢干以私宴賓客魚一孟菜菓

一孟酒數行輒止費不過數十錢以上隨至官惟兩童子琴書一肩而已去郡之日亦如之人呼為

葉青天

王一中

舊浙江通志字石門麗水人萬曆丁未進士

愬三邑皆以清廉著擢御史疏罷內市糾保

姆客氏權璫魏忠賢巡按山東平妖寇徐鴻儒等

陞京卿忠賢矯旨削奪居家十餘載研究道德性

命之學述五經輯郡乘至老手不釋卷起光祿以

不附時要調南光祿疏乞休卒所著有瑞芝堂集

經書疏解東

巡疏草諸書

浙江通志卷一百九十一